



楓泉集二

詩

共八

16
2353
2



2853
8-2

楓泉集卷之三目錄

樂樓齋

詩

壺舍春夜與履翁斗室拈韻共賦

陪駕 太廟次呈琶西見示韻

玉壺漫賦

承命考武試試畢坐碧油中戲賦俚體呈斗室

太史 三首

從金生思皓借北庭地半丈拓南墻戲吟絕句
與之

庭槐

伐杏

次柳檢書本學玉壺乳泉韻

題飛來亭

答沈維翰 能岳

申文則 緝 餉龍門山蔬

蒙恩解將任志喜為賦

舍下諸少地坐燒截行酒遂用詠扇聯句韻戲

賦

夜坐拈韻共金石閒安天宅賦

晨興

雪中入玉壺

石閒至共賦

陪松園從叔父遊玉壺洞同遊者憇軒石閒薄

庭三戒齋也拈唐韻共賦

拈唐人韻與李甥穉圭金石閒共賦是夕風雨

驟作

奉餞竹里族叔馬洲通信之行

贈李中和一愚隨通信使行

送菊隱上舍隨通信使行 二首

絕句贈泊翁李書記明五馬島之行

春日漫賦 二首

暮春之月元根將北遊咸關東至金剛自農巖
三淵二祖後吾家人罕並東北遊者漫賦近

體送行

北亭拈東坡韻

坤殿誕辰琶西以詩相賀依韻謹次

夜月暑退臥南軒憶溪上

晚步西園拈杜

摘院偶賦臨溪 二首

夜坐懷春觀

次簡易韻與穉圭迨根共賦

摘院直夜偶賦秋懷

暮歸竹東悵悵有感

謹次石室先祖贈曹侍御韻送曹尚書 九次 赴

燕

奉別尹明府 魯東 之安東任所

江右叔送饋新生兒百日飯 履陽

仲春七日值閒漫賦奉呈淵泉老叔 履陽

同竹里江右滄濱 履會 三叔申仲立兒子迨根
賞北渚桃花僕實初至淵泉叔忽追躡共宿

倉舍 二首

林扃

斲欄

柳

玉壺洞中作

又拈東坡韻與羣公共賦

趙君素園與諸公用杜韻

壺舍雨中步東坡韻與薄翁言志

又拈坡韻共賦 二首

讀嚴陵傳

門中諸長老枉玉壺陪歡永日仍拈東坡韻恭

賦請教

廿四夜小酌拈坡公韻

次竹里遊扶旺寺韻

題新筴易新老弊筴

送書狀官閔遠之 致載

暝坐

盆池種魚與藕

喜雨

竹里叔去秋自馬島携贈盆柑置書室中今春

發葉結花有花結實亦可期賦此志喜兼奉
示竹里

次詠白杜鵑韻

送申仲立之務安任所

北屯賞桃用去年韻口占

夜宿玉壺朝起拈東坡韻

楊根舟中遇雨

梨湖泛舟

望嶽

思飲 二首

斂跡

歇菴從兄終祥日感吟

山房

茅堂

所廬

華城途中與石閒聯鑣和杜 五首

馬上漫吟

午憩果川店舍

華城歸路過北方村

篋中得翠微詩步韻寄之

示道元兩兒

送三行人紫霞

申緯

臘月既望禁直對月賦示經山少友祈正

書飛來亭

次翠微聽琴韻

同竹里叔赴西漁權侍郎聚好

常慎

泛舟之約

馬上用西漁軸中韻口占

三首

日休亭次軸韻

絕句寄呈竹石

五首

石閒至山舍踐前夕之約畱宿拈韻

三首

絕句奉呈三陟權使君

太應

乞海石

可歎

孟夏用韓文公陸渾山火和皇甫湜用其韻之

韻憫旱

履翁太史獨阻監印之役用僕前韻賦示悲恨

之意遂同諸公奉次請正

諸僚日會分司每於飯頃茶暇輒恣清談相娛

灘樵李公一日忽盛說楊根鄉居之樂戲賦

一律呈灘樵乞破嘲因轉塵諸僚同和

盆榴稍有菱葉金生思皓摘去之戲賦自廣

金石李侍郎性老

存秀

用陶瓶貯菡萏至閣中

遂以斗室戲灘樵韻賦之

贈琴師

代琴師答

斗室先生大昨以僕於抵竹石書有食鱸嘔心
罪在斗室之語又餉鱸一尾僕輒復作惡走
入山間經宿始稍定然念李長吉有鬼才之
稱而終以嘔心而夭今先生使人必欲爲嘔
心之鬼左元放以絕世之幻技爲孟德只得
四尾鱸而今先生如坡翁之舉網將使江中

之巨口細鱗盡其族類而後已噫先生之不
仁也余思無法可解無術可免則輒誦西方
極樂界中警世度人之語及之篇末先生或
當犁然於心而不復造種種口業否耶惶懼
仄俟之至

八月廿三卽僕懸弧之日也家人具酒相勸遂
分饋于閣中諸公諸公爲賦詩相賀祈頌之
辭多非愚鹵所敢安然滿目瓊瑤實傳家之
上寶也謹次其韻以識感佩之誠云

又次晚磯令公見贈

玉壺與竹里叔宿明日拈蘇長公韻賦此

復疊前韻呈竹里叔

山齋夜坐次李供奉紫極宮感秋韻今年正四十九也

經山鄭直閣元容才美年少見者慕悅而又喜

為詩詩且工後進中僕所罕覩也分司晝雨

校書有暇漫賦此詩屬之雖似近諧實寓祈

祝幸於粲齒之餘毋慳瓊報

朴尚書宗慶餉巖墅稻粟問壺中物有可分者

信筆書絕句為謝

小重陽

及健李相公時秀歲釀甘菊為酒以一壺見賜

飲罷賦詩為謝

送金大卿箕景歸忠州

送澹寧洪尚書義浩上使三首

畱棋者

栽水仙花賦示道兒

詠雪次韓文公詩韻

灘樵昨日之飲僕不得與今日灘樵携酒而僕

忝據右席卒飲作主二首

分司書感

立春日吟示蒞館李侍郎子田

龍秀 ○ 二首

蒞館主人見余立春山居詩次韻相投復要余

和遂書此奉贈

孝田沈泰登

魯崇

將就直

園寢賦呈一律

山雨吟病有懷諸僚對校之役遂用年前唱酬

韻賦呈斗室兼示左僚諸公仍乞瓊報

東省共諸僚餞春拈唐詩韻

約諸僚遊流霞亭余與江右族叔乘小艇溯鷺

湖來會拈韻共賦

與江右叔挈小舟由鷺湖溯上壘年前江游韻

仍示諸僚共賦 二首

浮生

與諸公飲酒流霞亭有懷經山

列聖御製續印告完二十四日將進書開局以後

閣僚與是役者夙入暮退無日或曠余與斗室

諸長僚五日一赴迄今甲戌季夏二十日而止

暮月周旋行將散矣聊述抒感

途中雜咏 三首

江外望趨揖山

自香谷舟下京城

過華陽亭

途上木偶

郊店偶成

平邱店舍午飯

賦鵝

七夕

溪上折取楓枝有感

擬古吹張曲江感遇詩韻八首

中秋溪上步月

再從姪孟汝教根第別黃州使君二首

精舍謾吟三首

夜坐次農巖韻依刻燭令石閒稱頭痛則罰一

椀井灑

聞乞兒聲

入壺舍二首

晚磯索胡椒

次琶西老人韻

送平泉李尚書元汝義甲按北關

古意二首

聞餓孳在塗賦而志感

夢遇李文翼晤語如常皆時事也

病裏春寒 二首

楓皋集卷之三

詩

壺舍春夜與屐翁斗室拈韻共賦

晚食新羹吹浪魚深樽漾綠澹春湖山花繞屋籬松
間石溜懸槽篔竹孤吾事方知今日有公詩不可此
間無觀碁較似行碁苦多馬還須慶哨壺

陪駕 太廟次呈琵琶西見示韻

清廟朝來扈 玉輿軍前春晝覺遲舒散休火伍眠
熊虎閒把牙籤覓蠹魚自是元戎耽整暇非關夙業
補遺餘新詩一幅從誰得老健琵琶興不虛



玉壺漫賦

幽伴何勞覓家家客自尋天晴春更鬧花盛洞無深
佳景忘多酌衰年畏苦吟晚來松下歇嵐翠滴前岑
承命考武試試畢坐碧油中戲賦俚體呈斗室

太史

軍國之要講一章單巡兩中豈穿楊功名將相元相
等何苦龍門點額忙
監的臨文鬧一迴俄然虎榜逐名開碧油閑想諸公
狀閱卷迷離醉眼擡
數萬青衿揀廿人遙憐斗叟獨勞神公嚴認是生平

願添得明廷幾寶臣

從金生思皓借北庭地半丈拓南墻戲吟絕句
與之

隙地拓來纔半間求非廉也與非慳雖令垣抵窓前
築不過延君屋上山

庭槐

庭畔一槐樹上有雙鵲巢亭亭圓蓋成綠陰當軒交
朱夏不知來清風常滿梢我欲因為屋不煩庇衡茅
題詩與樹神霜雪莫相拋

伐杏

遮堂兩杏樹尋斧伐其頑風便丁丁盡天光落落還
櫺前應得月簾外久思山佳氣無時歇哦詩始好顏

次柳檢書本學玉壺乳泉韻

自我來棲息幾多飲此泉徒知滿腹飲述作猶寂然
柳子發天機芳潔謝萱羶意若憾俗人妄相事烹煎
贊皇起無日鴻漸逝多年讀詩復一酌水哉君所憐

題飛來亭

壺腹堪容跡幽閒近自然山光如邃古石氣可長年
未是人求遠庸非物有遷吾言應不妄試酌惠生泉

答沈維翰

能岳

久知荷盛尊粵自贅令門薦與蘿為托膠投漆不痕
論襟無曉夜比業屢涼暄希鳥容鷺小他山愧玉温
清朝身共致遲暮愛彌敦命駕凌霖雨登堂接晤言
醇從公瑾醉禮似少施飧繾綣忘暉仄清真却暑煩
高情懷澹泊末俗慨馳奔秉德洵如結行休庶克繁
汗寧私好徇感獨典型存賦此墳簾樂傳家世勿諉

申文則緝餉龍門山蔬

蔬自龍門山寺出龍門是我故山隣恰如當日張曹
掾政值秋風坐憶尊

蒙恩解將任志喜為賦

休時更比做時榮敢道區區志竟成向也嬰兒匍匐
入今猶走者羽翰生解還符印心如得鞞掛弓刀手
自輕來日騎驢誰復禁八年端不出王城

舍下諸少地坐燒截行酒遂用詠扇聯句韻戲

賦

會者十八人人盡躡鞵庭心謀所食食非脯與脰
圓鐵凹其中加弗鉅鑪排割肉大視葉鹹淡調以諧
軟者鮮可膾剛亦不至哇大武味羣毛珍妙絕魚鮭
獸炭初噴紫烘焙猛鑽槐彼亟燒便咽失聲起啾呢
衆噓一闕堂還復舉筋偕坎科投輒爛有似抱竿蛙

沿郭取或徐却像粘壁蝸逡巡豈推讓攘奪非睽乖
繞坐同班荆掃地訝燔柴若塊攫餒虎若流赴渴駟
充腸制伏陰浹肌散積霾士皆廉頗老人無太常齋
肯學燒丹葛回晒煉石媧噲急隴生響綴紛臂相挨
爨香椒搗泥汁甜蜜剖崖添油聞魚爆截葱見規楷
沫飛頻汚袖氣煮遠過街禮曲論齒決優稽諷腹埋
食馬恐猶傷談龍信徒佳稱美恣咀嚙狼藉移辰牌
死者寧不苦庖犧是厲階豢悅鳥獸始巧取及網叉
誰慕穎叔舍應羨曼倩懷彭亨肚輓鼓酪酏酒抵淮
使有曹劇看鄙者滔滔皆狗子四來嗅伸嘴覓遺骸

翻手或執熱迅欲濯水涯望啄睨髻指供具喧環釵
卜夜方厭厭需雲息潛潛飲比長鯨吸哺限乳鷄嗜
蔬熟縷紉芡湯滾波淪瀆切生笑噲麤飽死憂侏侏
炙卽納石城味暇辨蔗菱惜未張細樂恨不挾雙娃
胃官棘徵斂舌家煩追差竊怪貪如狼復懼化爲豺
折蔗或先根刈豈尚畱蔗譬此數抔土將填徹底洼
譬彼點綴雲卷入疾吹颿滿志乃撒手相顧吻腮揩
憶余昔年少亦與君等儕君生大食國定縮上卿縞
夜坐拈韻共金石閒安天宅賦
耿耿心知白露寒盆荷香褪井梧殘葯翁倦興臨樽

得蓑叟斑毛借鏡看萬事應須從俗好一生祇是抵
秋難窓間輾轉釭花結苦癖吟詩字未安

晨興

晨興畢梳髮褰衣涉高園草木抱秋氣零露淨而繁
高蟬邈不聞羣蟹代其言蕭條遠墟烟蒼涼澄宇曠
時物一以嬾感慨中心存何以致此日所歷忽如奔
前脩旣云遠範軼不可捫百年諒不促乾沒亦何論

雪中入玉壺

庭院已盈寸山中深可知泥銀鴻爪斃屑玉馬蹄隨
滉漾仍爲色喧騰不藉吹羣枯抽獨綠無錯辨梅枝

石閒至共賦

山光漠漠樹如眠一半寒谿入斷烟茅屋生涯殘雪裏梅花消息小春前有誰晤語聊今夕無奈牢愁甚去年歷盡悲歡身已老壺亭擬學隱壺仙

陪松園從叔父遊玉壺洞同遊者憨軒石閒薄

庭三戒齋也拈唐韻共賦

有計終身短無為瞬睫長枯藜鳴洞口老樹劈山光花雜迷醇氣嵐晴暖墨行優遊資俊彥不羨結金場

拈唐人韻與李甥穉圭金石閒共賦是夕風雨

驟作

比日山家饒喜事鄰蕉乞得插新梅病根漸與春寒去詩思潛令酒戶開常懼虛名完不了深知盛歲逝難回風騷剩許賢甥擅孟氏園中痛飲來

奉餞竹里族叔馬洲通信之行

沒雲臺盡豁天青鏡鼓嘲轟破窅冥咫尺東方君子國尋常南極老人星諧為喻道鯤鵬化聖自全神輓蜓聽歸日須知張博望宛駒却損漢威靈

贈李中和一愚隨通信使行

并序

君舊余部曲也疎宕負奇氣寡合不遇官不顯而家益貧願喜與文人遊又能吟詩以宣

略將軍銜隨竹里叔赴對馬州瀕行參余長
跪稱不敢者再請詩為贖余素愛其為人故
既薦於竹里而復酬其請

青雲眼冷雪侵髭姓李將軍數更奇投筆班生終自
悔乘槎博望漫相隨滄波鰲戲春山動析木烏翻曉
日麗萬里封侯祇一快爭如人誦海遊詩

送菊隱上舍隨通信使行

都門祖送使臣行文武才俱幕府英就裏長身頽面
客呼為菊隱李先生

莫道人文限海湄吾妻鏡入竹枝詞從來載籍關治

教不比西藏貝葉奇

絕句贈泊翁李書記明五馬島之行

東坡冠下碧羅袍書記文瀾又海濤藤橘平源多舊
裔索詩應問謝家毛

春日漫賦

自天降雲氣淒淒方有滄冲融釀膏澤濛濛八表奄
潤若軟酥滑密比隙塵閃枝蕾苑而顛原萌鮮自漸
譬如肖物者隨手施糴點莫苦造化心誠哉不可掩
我壇蕙草傍子屋杏樹下和颺昨間吹靈雨今朝灑
的皜已可愛蓬勃誰禁者寄情園中物想像見原野

問君舊郊居今爲誰所舍繞落桃始紅沿溪柳方韉
復應青帘風酒熟山中社

暮春之月元根將北遊咸關東至金剛自農巖
三淵二祖後吾家人罕并東北遊者漫賦近體

送行

東見蓬萊北沃沮茲遊奇絕勝家居吾於海嶽身無
分爾與農淵踵作初行李正當三月半風光依舊百
年餘歸來一格應須長莫認天涯但倚閭

北亭拈東坡韻

碧榭紅亭入霽光風前白袷覺輕涼轅門靜擁溪山

秀硯几深畱卉木香此地看花真厚福諸公視草幾
多忙心知信宿佳期在清曠頻回坐後岡

坤殿誕辰琶西以詩相賀依韻謹次

長秋慶節夏維中祝嘏庭紳早造公北斗南山騰獻
彩祥雲瑞日頌呈紅已知元吉承乾道更覩重光出
震宮頭白詞人摛賀語林扉拚和寸心同

夜月暑退臥南軒憶溪上

空庭月照人寂寂暑氣俄然無處覓穆穆澄霄林梢
浮泫泫清露艸端滴節物悠悠暗近秋鳴蟲唧唧侵
戶壁遙憐此時溪上路石響高低散泝泝

晚步西園拈杜

風日晡逾美園中細步來戀春紅自剩迎夏綠初迴
莫道詩情倦端教酒量開層層碍冠樹多半去年栽

摘院偶賦臨溪

薄暮閒引屨似與鶴相佇暗聞漱玉響薜蘿深綠處
欣然臨小石清吹滌蒸暑泓澄本在我流通每求汝
須臾聲聞空浮念一切去

題詩梧葉上投之任所如將流忽漩洄似若顧戀余
余亦注眼看眼華纈清虛山禽不見恠飛過衝我裾
向來緣機誤物我元未疎

夜坐懷春觀

鴈盡風高奈此宵離懷難抵酒痕消形依片竹分清
苦心繫寒雲共沈寥明月山間人寂寂孤舟江上夢
迢迢他時若問揚雄賦祇有新編號解嘲

次簡易韻與穉圭迨根共賦

晴罷思臨瀑風來憶放舟病仍紆俗慮天若禁吾遊
飢鶴窺空鼎秋蝸上廢樓未能除舊癖真境即詩求
摘院直夜偶賦秋懷

瞿然四聽盡秋聲畫屋無人睡不成霜重黃花空自
苦夜深孤月為誰明流年到限憂方輟凡事經場悔

始萌癸戟青綾何與我斑毛贏得此中生

暮歸竹東悵有感

昔向壺中來歡喜如已疾今辭壺中去蒼茫若有失
壺中雖吾築竹東亦吾室諒吾身所安於彼此乎一
矧彼完且美非比此荒率又諸從者情懼或淹月日
云何去來際吾獨嘗茶蜜茶蜜故在心吾亦不能詰
試向青松問有聲但瑟瑟次復語溪水不住流汨汨
老石寂如聞其實靈性室縱有異禽在豈爲人所暱
一步一踟躕如汲瓶斷繙知吾者竟誰歎息柴門出

謹次石室先祖贈曹侍御韻送曹尚書九大赴

燕

清朝令德近稀年使節重携鴨水邊雪飲冰餐猶健
否遼雲薊月更茫然三皇舊業山河在兩祖遺詩
宇宙傳欲唱驪駒憐病臥郊亭凍柳不成鞭

奉別尹明府魯東之安東任所

使君宰古昌古昌余本鄉鄉人重使君一顧有輝光
徒御况再屈鄭重出凡常臨別索贈言謂余通詞章
使君誠過諭使君自大方使君降維癸長余十二霜
憶昔南城下少小識隣芳使君已勝冠開口吐鳳凰
時人誦佳句聲名藉序庠余纔及就傳童習猶嬉荒

當時比使君蟾蜍逐飛黃至今企羨意不改昔望洋
將何塞尊命倉卒殊慙惶更惟使君賢愷悌以慈良
昭德眷外氏疎遠且不忘豈余下俚音真能清耳當
使君漸迫髦余髮亦艾蒼遯矣大嶺外離緒正茫茫
朝廷須文學使君胡彷徨吏事亦勞止使君願日康
臨風想德音慨然以深長

江右叔送饋新生兒百日飯

賀生羊酒古風然繡縷鞶囊雜管玄羹飯飽餘題頌
語推今計日計渠年

仲春七日值閒漫賦奉呈淵泉老叔

履陽

縱百吾年活能重逝歲來有涯非草沒如舊但花開
且喜青眸在何論白髮催願公僑北渚送盡此春回

同竹里江右滄濱

履會

三叔申仲立兒子道根

賞北渚桃花僕實初至淵泉叔忽追躡共宿倉
舍

西崦亭沼話微塵東谷桃花耀眼新十里違山如遠
道一朝出郭便知津種前應屬荒涼境開後真堪富
貴人酒盡林間成止宿五更殘月衆香身

幽情暢叙出凡塵行盡清溪興愈新宛是風流追曲
水何須消息漏仙津花間細路初歸客松下餘樽半

醉人安得龍眠傳繪素他年看作臥遊身

林扃

浮嵐麗旭擁林扃日見繁紅間四青有客相携臨小
澗無人孤坐愛荒亭畫圖濃潤雲屏對絲竹清冷谷
籟聽佳句每懷張氏隱春山伐木又丁丁

斲欄

小軒南牖下素木斲爲欄限抵仍檐短傍通得室寬
暎花朱已美點筆石猶寒倚久心無厭新晴月正團
柳

帶雨尤風不自持鵝黃誰遣染春絲啼鶯借與仍全

樹驕馬行經減一枝天上投根聞古諺雪中吟絮憶
芳姿冷烟斜日青門路幽恨年年似別離

玉壺洞中作

偶然騎馬三清洞節晚不知春已經高柳帶風鳥款
款遊絲冒日花冥冥木頭山鱉正堪摘石首河豚能
使醒但若遊迴無一句應須惱殺嶽之靈

又拈東坡韻與羣公共賦

春到痾除興可堪臨樽詠志分還甘高松住客清溪
外落日懷人大嶺南醉袂縱橫痕酒墨衰顏髣髴化
雲嵐山間此會良難數看取柴門碧柳甍

趙君素園與諸公用杜韻

相隨荒徑問羊求茅屋全收一壑幽灼灼緋桃開小
塢嚶嚶黃鳥喚前邱老來怕作傷春賦醉後聊成秉
燭遊乘興不知山外事武陵何必獨迷舟

壺舍雨中步東坡韻與薄翁言志

視君猶湧濤我自居潺溜伊昔少年日智力兩莫鬪
垂老更相試益知處我右愚欲借丸泥與君塞慧竇
絕險強角逐捷足驚懸狄貞曜夏亦寒工部飽猶瘦
誰傳廣陵散如聞雍門奏縱橫弄百巧自中古人殼
藐然對汗顏燃爝妄繼晝山雨政宜君盡情吐芳漱

又拈坡韻共賦

笑者似乎喜嗔者似乎怨行同情或異相去不啻萬
氣類苟感通女蘿托蔦蔓忠信或未昭帶礪徒虛券
張堅劇狡獪百般弄機圈莫燃心上火催熟黃梁飯
眼前一杯酒我在君猶勸天地亦有憾人生幾時健
一朝雙脚直安用三牲獻試問北邱魂長生誰不願
衆流終赴壑人生亦何怨出門望盤古誰復壽及萬
遙遙桂陽阡孤瑩蒙蔽蔓所嗟云亡後殄瘁可契券
平生經濟術不踰仁義圈斂歸竟安施如夢有酒飯
賞音久已絕駑怯味創勸抽腸有餘慟萬事日忘健

區區報微誠庶幾志文獻三生信如說兄弟重可願

讀嚴陵傳

五夜天文太史驚羊裘何事出東京知君亦是漁名
客猶勝磻溪罷釣行

門中諸長老枉玉壺陪歡永日仍拈東坡韻恭

賦請教

嘉會山間不負期吾宗諸老迨閒時芳筵秩秩開新
酒幽鳥嚶嚶續古詩數道巖泉元一脉百年庭樹又
千枝恭陪杖屨歡情洽更願西林駐景遲

廿四夜小酌拈坡公韻

碧空殘月掛簾前秋色秋懷共渺然細酌畱朋忘抵
曉高樓送別惜經年祇看鬢髮偏相促未信文章必
可傳華實如今無箇着原初悔不學逃禪

次竹里游扶旺寺韻

石壘晴霄近山深樹易秋風雲排嶽勢日夜對江流
義相棲筇地温王定鼎州茲遊頗俊特芳躅可同畱
題新筴易新老槃筴

一裘三十年韞在猶餘温三年揮一扇紙破風焉存
何不擲去之爲余畱墨痕感君結區區德諒有昭敦
一枝足知桂全樹寧復論晏平善與交魯聖有袞言

送書狀官閔遠之 致載

君今似我舊經過
簪豸驅軺意若何
脩路四千觀亦偉
古詩三百誦還多
出門肯有幾微色
和筑應爲慷慨歌
往事遼陽休問鶴
英雄淚盡此山河

暝坐

嶺日下冉冉夕雲共
漠漠遠樹起暝色
寒烟繞山脚支頤坐
檐楹注目歸巢鵲
忽然念我止感激
增心弱信書諒已篤
守志更無約寸寸自謂前
不知行已却大道日以遠
反顧常懷怍爲堂不先整藩籬
安用拓樹瓜失漑培有蒂終枯落
盛年已不及遲暮復奈若

夙夜慕古心妄欲奮著作
山木美可材庸工昧所度
向來太突兀於今遂穿鑿
堪笑捕風者空網四無着
朝聞可夕死亦不羨麟閣

盆池種魚與藕

種訖魚苗種藕根
蒼苔覆水水盈盆
佇聞潑刺銀刀躍行見
高低翠蓋翻莊問惠知遊
戲劇房成子結苦心存
春來養疾朝叅懶記實山
家有永言

喜雨

清明氣候太和中
生意渾然物我同
簾角斜飛紅杏雨
墻頭細拂綠楊風
嵯峨冰雪今何在
磊落光陰正

不窮夏與南民遙祝賀漸漸麥穗已占豐

竹里叔去秋自馬島携贈盆柑置書室中今春發葉結花有花結實亦可期賦此志喜兼奉示

竹里

萬里鯨濤過不知盆中無恙綠珊瑚枝梅窓煖借冰霜遠桂檻寒銷雨露滋已喜白花迎夏結應看黃實及秋垂百年來德心長苦莫擬荊州博絹癡

次詠白杜鵑韻

分外眼明看不移千叢紅裏一冰姿文君定為哀吟老號國休誇淡掃奇綃合剪霜描豈了蝶非翻綵宿

誰知芳魂灑盡東風血月落山空羽化時

送申仲立之務安任所

縣小民貧不可聊飢來驅汝海壖遙今之良吏輕椎髓古則高人重折腰濟物寧忘平昔志束躬猶答聖明朝酒間錯莫羣公歎鷄割牛刀魯叟嘲

北屯賞桃用去年韻口占

沿溪路熟不飛塵雲壑朝開物色新自有桃花重引步如何漁子昔迷津殘齡計謬歸田日此地思從種樹人悵悵坐看紅雨晚渺然流水嗒然身

夜宿玉壺朝起拈東坡韻

夜來雷雨息朝至碓流橫碧樹萬蟬集玉屏初日明
臨歸懷未盡似別意相驚借問杯中物爲君幾度傾

楊根舟中遇雨

滯雨楊根縣維舟待夕炊鄉山不可望烟水渺然悲
岸滑行人息汀寒宿鷺知寒篷無限恨非是入京遲

梨湖泛舟

鳴櫓慣尋梨浦去何曾魚鳥駭人顏波頭石戴千年
塔雲際江來四郡山豈有文章畱宇內聊携樽酒臥
篷間好隨殘照歸沙岸燈火亭樓望夏閒

望嶽

北岸停歸騎垂鞭一望賒山形收去水草色限平沙
別路秋雲黓江風暮雨斜蒼烟籠嶽下若個是吾家

思飲

清光白如畫一月凡幾有秀菊自傲霜精神全獨久
對此奇絕景安得不思酒酒旣無從得又不見我友
我友本酒人一醉每三斗詩情故不羣發之耳熱後
今宵在何許亦復思我否

覆蕉隍鹿尋擣薤鐵杵嚼夢中夢常亂達人好堪噓
楚相冒鄭仇趙城羅魯薄幻處幻更有天公本善謔
四萬八千年來日祇如昨眼前一杯酒誰謂之狂藥

冥冥反元始甲子也忘却

斂跡

竊祿幸時平非材愧主明投衰思謝事斂跡幸辭兵
望道心猶急含恩命亦輕彷徨懷古昔怵惕數平生
歇菴從兄終祥日感吟

兄乎弟慟倘監臨知不知間不可斟終使有靈安所
補元如無覺欲誰尋星霜何與人云禮凡聖同休化
底心郢斲牙絃當日恨茫茫宇宙古猶今

山房

山房似山寺仄徑到雲巒門對千松靜籬迴一水寒

秋情思獨坐殘照耐遙看最愛通幽處霜花數畝寬

茅堂

不瓦為堂代以茅祇思居處傲閒郊築成小銚均泥
粉插得疎籬斬竹梢碧岫芳林當畫本瓊籤繡笈作
書巢劉郎陋室銘還在謂語時人莫謾嘲

所廬

一尋室猶過七尺身無餘坐臥周旋得東西南北虛
達觀如是故君子不嫌居嘗喜淵明氏欣然愛所廬
華城途中與石閒聯鑣和杜

慣是南充縣頻年作使星愀然攀 聖躅恍若覲先

靈老淚憑誰拭傷心獨自銘行宮墻下竹猶似舊時青

筋力猶堪効馳驅亦所能氣清人自愜閒久馬如騰
漢寺同聽雨遼河共飲冰昔遊皆已夢今伴又何稱
處處看禾黍油油沒馬頭芙蓉真有慶山野一無愁
匏落鷄豚散荷塘鴈鴨浮不知行路遠滿目是登秋
灤水當年事菟裘後日心穿渠成活水植木作深林
獨運 重宸策寧論太府金遲遲臺上望腸斷舊賡
吟

漫漫行抵夕忽覺旅愁添村火孤生耿秋岑碧露尖

苔碑多沒面木堠又何髯店酒須澆悶酸醅且莫嫌

馬上漫吟

輓脫車傾更據鞍風霜冽冽透衣寒吾生注定元多
苦又是今宵行路難

午憩果川店舍

吳興彬酒味殊芳不減楊根徐德昌煖飲一杯攤卷
臥誰知是店是山房

華城歸路過北方村

立冬之候暖於春野日無風醉殺人水暖鳧聲爭曬
浴沙晴馬跡細生塵麥根未宿青齊立山氣猶濃黛

欲嘖休道木綿花少摘可知天意眷寒民

篋中得翠微詩步韻寄之

遐想出烟塵癯形宜山澤胡為飢所驅遠作折腰客
自我送君來悵悵意少適呻吟臥壺廬門稀車轍跡
涼氣忽經竹清韻何撼撼園柯齊食實絡石間黃赤
感時憂道遠中自抱冰蘖鳴鳥久不聞大雅遂無作
人生良易老奈此白露夕徘徊望天末歎息思脉脉
念君在家日來即並我席慕尚恥苟合微言不煩釋
玉山映眼中峨峨露孤白澹澹久知敬忠誠內自積
如何復如何久貽參商隔千里見尺素重複訴吏役

疾首撻疲氓日夜租錢索驥足跼未展經綸違夙昔

曷云賦解紱雅契申金石抒情鞠憂思知應神祇格

示道元兩兒

時道根直玉署
元根直桂坊

伯仲曾何業苦攻文居瀛閣蔭銅龍論思講席元清
選護翊 离宮豈賤蹤爾輩寧知先緒接吾生甚懼
盛時逢前車覆否無多別一轍橫云一轍縱

送三行人紫霞申

緯

九州之大在金臺歷帝王年八百來吾昔望洋旋面
歎君今登嶽盪曾回悲歌重諾仍遺俗博學宏詞盡
茂材遊到酣時應自覺人生海外亦何哉

臘月既望禁直對月賦示經山少友祈正

映風金屑灑霏霏頭白詞人捲繡幃天際不教雲作
意山間應與雪添輝循庭凍鶴凌空警繞樹寒鷗認
曉飛總為清光祗此夜高樓惓悵歲華歸

書飛來亭

物態紛紛孰假真呼牛與馬可安身不知無用麤如
我四萬年來有幾人

次翠微聽琴韻

說琴我猶謎君辨殊玄著著然我猶晦亦自有緣故
我本師心甚解義厭依附絲音猶人性動靜各可語

理一氣亦一分殊執何處指動音亦動指住音亦住
住動只一氣數萬只一數清濁各一音在理豈不具
君子闕所疑是以知有譽魯叟不言性而敢舍之去
助苗反握苗孟氏亦深懼我詩托琴心長懷萬世慮
同竹里叔赴西漁權侍郎裝好常慎泛舟之約
馬上用西漁軸中韻口占

催動芳隣睡聯鑣趁早行閭閻身已遠郊野眼先明
晞露沙光斂晴暉麥色生故人應待久詩社卅年情
巖居如佛水如仙遊戲人間孰愈然謝眺青山違卜
宅蘇公赤壁謾登船江波不起晚潮後嶺月已生沈

日前努力諸公酬好景明年猶恐負今年

沙頭稍稍暝烟分落水餘霞散綺文滿地江湖渾着
我長洲蘭杜正思君夜深何處多明月山盡依然似
斷雲忽覺仙遊峯漸近遙天笙鶴恍疑聞

日休亭次軸韻

繫舟青岸下幽徑接名園樹老清吹密江空列宿繁
題詩無俗筆隨境有新樽安得塵緣謝從君此晤言

絕句寄呈竹石

并序

杞菊園巢之集雖不得已之致然叙樂事道
故情不知日之將夕而老之將至何減曹溪

之遊也吾輩衰謝日甚又各有事故一會固
未易會而畢集尤不可得今日之會雖無絲
竹管絃之音山林澗壑之勝亦得其未易與
不可得者歸而思之終不容遂無一言爰賦
絕句五首奉塵清覽幸簡恕其蕪陋特與與
席諸公各賜璫和卽所謂土缶之音發玉琯
之聲也感喜庸可旣乎上竹石大詞伯

訪水尋山謂漫然從今想昔信關緣罇前悵望看西
日一曲曹溪負盛年

樹杞爲門菊補籬陰成桃李亦多時小堂未許橫肱

坐清白傳家更數誰

園西石角狀嶽峯鑿鋪煩君力及深出海金剛應有

日安知峯壑不庭心園中有石角露見余勸主翁亟掘其根若使大峯巒藏在地中

何讓海金剛也主翁曰須掘七百里恐掘不去相與大笑

扇面分明境不迷名園綠水野橋低少陵佳句如相

待豈尹摸完竹老題

有酒無肴自古愁那堪不飲對瓊羞從來邦禁祇新

釀餘瀝傾殘詎足尤主翁以有禁藏舊飲竹醪而不敢出僕云禁止新釀餘瀝何傷

遂出飲之殊佳絕

石閒至山舍踐前夕之約畱宿拈韻

沿溪數十戶通敞最吾家但挈一壺酒高臨全洞花

塢桃烘日綻門柳映山斜秀句挑春色豪情老更賒

勸君莫歸去君去亦非家牧廨無佳醞吾園有好花

舊歡每難續餘景幾何斜漸看紅飄處芳陰日自賒

酒尚君餘戶詩慚我未家莫辭舉蕉葉寧忍負桃花

捉臂青眸宛披肩白髮斜筠亭無俗客談笑洞暉賒

絕句奉呈三陟權使君太應乞海石

嶺花如赭海如藍歸路風光謾坐談一片雲根能丐

未深知與受兩非貪

可歎

鮫海沈沈路隔千思君此日合濟然一身去國心何
負老母辭堂理可憐從古是非常易晦看今忠孝兩
難全狂癡却向空山問人事蒼茫倘謂天

孟夏用韓文公陸渾山火和皇甫湜用其韻之

韻憫旱

五氣嬗斂忽代渾謀窘玄冥遏澤源哆口之箕助並
吞煽鼓蜚廉恣輕軒暮西朝東簸烘燔不可嚮邇若
燎原上薄玄間下盪坤瀕洞黃埃漲無垠望舒不肯
稅抹垣赤松斂跡狃寒門殷如噴血晨出噉兔虎騰
彩射鷄猿隊魚呷沫隣鼉黿羣鷺劇乾連鶴鷓焚旂

啓繇象號奔乾封徼祠聞靈尊觀麥于田草于園二
皆將無庶不繁其雨其雨萬姓喧夫唱婦喁如篋塤
哀訴長吏攀麾幡淚落連珠沾襦禪乖龍可笑無膚
臀窟中局促駒駕轅是時妖魃雙屬鞬前導虐厲乘
朱轡盜祝融旗載帑帑背惠作殃圖胙膳四郊殭孛
霧雲屯子遺懣鬱方戴盆帝嚴寧私褻牢罇地行賤
臣拜單言旱饑瘡札歲七翻恫我國勢翩其反大聲
以顛視張暖崇降疾威莫究根綏厥黎獻付神孫
生成毛髮暨頂跟嗚呼曷念不卒恩好生矧乃德之
元譬渴望飲溺手援抽腎嘔肝敢竭論縷懇裊裊濛

九閭徹不宵茫孰睇痕巫陽掌夢下招魂予其大賚
勿悲冤往否來泰聿固存繼自今豐衣足飧爾氓畊
鑿樂嫁婚萬歲昇平護 聖昆已命商羊舞蹲蹲夏
絜赤鳥飛騫騫我奉是音忘尤怨似聆管鳳與絃鯤
猗歟帝德深於滄海大崑崙果然八表俄同昏有滄
淒淒解悞焚我繹天心辭詎煩應如或忒舌可捫
履翁太史獨阻監印之役用僕前韻賦示悲恨
之意遂同諸公奉次請正

何心叨是役未死更淒涼東省連空籞西奎宛舊光
腸銷銅化字淚灑墨滋香終事紆 宸慕母孤歲月

忙

諸僚日會分司每於飯頃茶暇輒恣清談相娛
灘樵李公一日忽盛說楊根鄉居之樂戲賦一
律呈灘樵乞破嘲因轉塵諸僚同和

休思越甲每鳴吳一片揚州阻五湖雄辯饒君堅又
白緣機証我酪成醐也知屏翳曾漂蟻豈有姮娥直
為鱸篷屋覆嬰重可寫何如挽鹿入城圖

釣但我京口過造江方有此魚若
鷺湖銅津雖大水此魚不上也

公謂月黑
然後鱸可

盆榴稍有萎葉金生思皓摘去之戲賦自廣
盆中石榴樹夏實秋燁燁金氣貫殘暑稍稍見黃葉

景芝自下階摘來袖間攝云是青葱裏萎枯看不愜
請君莫謾苦萬事豈常慊春敷不待勸况可禁秋斂
摘摘但勞手何異白髮鑷草木猶自在衰盛閱窮劫
人生有百年頃隙若瞥睫今君鷄皮面是昨桃花頰

金石李侍郎性老存秀用陶瓶貯菡萏至閣中

遂以斗室戲灘樵韻賦之

解語端應解沼吳清波萬柄憶錢湖仙人渡海顏如
玉妙法名經頂灌醐釀得碧筒宜飲象斫來冰藕勝
烹鱸西亭舊賞今疑夢恨未當時作畫圖

贈琴師

行年四十九偶欲學琴為徒譜茫難尋問君待以師
君謂足可彈勸我且習之我苦不自揣甘心聽無疑
一習三五旬妄意出聲奇愈彈愈拙澀老指直如錐
絃撥不相應宮商每參差聞者掩耳走匿笑笑我癡
此夜懸燈坐促柱將調絲驀然覺君言大是慰藉辭
非我有彈才則君所處卑凡百天下技工少而廢衰
豈有半百翁始學如蒙兒此理久方覺知言敢自期
從今欲謝君匣琴高閣宜昭文昔不鼓乃無成與虧

代琴師答

琴師見贈詩意不然而文不能述其意遂代其答

公欲廢學琴請以文喻為凡人初問字口讀隨塾師

次次通經史自能揣摩之然後得妙解著述遂不疑
不有用力苦焉得造工奇勤者不窺園或亦至刺錐
始若殊鈍銛終見無參差琴奚獨無然專黠惰乃癡
聲不在虛空只藏指下絲將指日挑藏藏露絲敢辭
我思善彈者非限材高卑能與不能間惟志有盛衰
一彈復九拋任公葱竹兒葱竹及艾髦無有學成期
試憶讀書事應知琴所宜九仞在眼前可使一簣虧
斗室先生大昨以僕於抵竹石書有食鱸嘔心
罪在斗室之語又餉鱸一尾僕輒復作惡走入
山間經宿始稍定然念李長吉有鬼才之稱而

終以嘔心而夭今先生使人必欲爲嘔心之鬼
左元放以絕世之幻技爲孟德只得四尾鱸而
今先生如坡翁之舉網將使江中之巨口細鱗
盡其族類而後已噫先生之不仁也余思無法
可解無術可免則輒誦西方極樂界中警世度
人之語及之篇末先生或當犁然於心而不復
造種種口業否耶惶懼仄俟之至

君如勾踐不忘吳我效知章欲隱湖莫逞尊拳試鷄
肋寧欺半水比醍醐嘔心才李詩成鬼舉網仙蘇賦
盡鱸種業今生真可畏曾看犁舌佛家圖

八月廿三即僕懸弧之日也家人具酒相勸遂分饋于閣中諸公諸公為賦詩相賀祈頌之辭多非愚鹵所敢安然滿目瓊瑤實傳家之上寶也謹次其韻以識感佩之誠云

鮑庾高才俊且清新詩賀晬不其榮昇平本藉羣公力願作人間醉飽氓

又次晚磯令公見贈

忽值生朝意可知明年五十亦無遲莪蒿祇自纏深慟蒲柳那由禁早衰仙鶴南飛誰聽笛青牛西去客成詩眼前兒女紛紛事消得牢愁辦一卮

東坡生日有李委於

赤壁吹笛奏鶴南飛曲楊次公於錢穆父生日畫老子出關圖係之以詩

玉壺與竹里叔宿明日拈蘇長公韻賦此

林臯處處遍爛斑與客崎嶇度石關病渴劉伶耽席地悲秋宋玉怨登山寒雲莽蒼賓鴻後殘日遲徊隙駟間歸臥茅齋還想像向來光景未全閒

復疊前韻呈竹里叔

紅頰遊從到鬢斑邇來文墨又相關神交証我心如水健筆饒君力撼山一曲峨洋鍾子後同時大小夏侯間林楓砌菊休悵悵二老秋深病始閒

山齋夜坐次李供奉紫極宮感秋韻今年正四

十九也

青年竊未揆劬書期汗竹白首無所成尤悔寧可掬
涼颼噓玉宇耿耿抱靈獨晴月曉滿楹送我山間宿
大夢雖未覺不疑又何卜古人貴不遠今是昨猶復
良馬馳終蹶敲器虛渺覆四十九年內俯仰諒已熟

經山鄭直閣

元容

才美年少見者慕悅而又喜

為詩詩且工後進中僕所罕覩也分司晝雨杖
書有暇漫賦此詩屬之雖似近諧實寓祈祝幸
於粲齒之餘毋慳瓊報

春秋猶謂有人焉外氏吾家子又然才似廣文官不

冷博如通志學能專鷓鴣幾續新篇美書帶應餘舊
葉鮮御史聲名丞相業他時莫讓漢唐賢

朴尚書

宗慶

餉巖墅稻粟問壺中物有可分者

信筆書絕句為謝

粟紫稻黃秋正深故人餉我郊庄味壺中無物可相
酬一片冰心君照未

小重陽

遙空旅鴈盡南翔回首乾坤百感長哀壑暮雲流水
靜古城殘照碧峯涼烘烘岸葉含霜赤燦燦籬花濯
露黃明日登高誰送酒天涯憶別又重陽

及健李相公

時秀

歲釀甘菊為酒以一壺見賜

飲罷賦詩為謝

百花媚春暉不知秋氣清黃鞠獨何心凌霜發金英
靈均昔夕餐離騷播芳聲籬下採元亮自托高世情
復有潭傍叟飲泉得長生茲皆愛菊者千載留其名
相公臥駱山老圃連東城秋思挹晚香復惜委枯莖
不用為囊枕亦不事煎烹惟翹試餘術芳醞每盈盈
雅量推同好一瓶勞專伴牢騷正渴病急就梅前傾
濃濃碧酥搖泛泛雙南輕一飲香沁脾遂欲忘飯羹
再飲煩慮散愉愉心和平三飲但天真肫肫還孩嬰

君山未曾嘗白墮那足評愚鹵雖似我久服必聰明
我却持此觴祝公如錢鏐公勿忘歲歲視我以公榮

送金大卿

箕景

歸忠州

鬱鬱紅塵內儒冠四十秋扁舟載妻子明日上忠州
從此雲山隔能忘竹馬遊臨分無限感我亦拙身謀

送澹寧洪尚書

義浩

上使

蘿衣脫却拭朝冠千尺玄冰冽水寒不是明廷優老
簡星槎三涉使乎難

澹寧近住鄉園養開而三膺專對

山河城郭過如初玉館停驂又歲除恭賀此番無一
事交名士盡覓奇書

龍角山中老畫師計今年過七旬奇憑君灑寄存亡

淚夢斷書沉天一涯

張水屋刺史自稱龍角山中畫師與僕定交在乾隆癸丑近年寂不聞消息或傳已作故或傳尚在霸州任所或傳老歸本鄉幸澹寧得的耗來也

畱棋者

請與君為戲山寒斷轍蹄熏籠焙子凍方罨拭塵棲
坐隱名元妙過行手即低梅樽餘漉在直到日銜西

栽水仙花賦示道兒

恆情對好人却作好花視好花自無數誰與茲花比
雪抽疑蕙葉臘垂並梅藥點塵不畱身靈根濯寒水
尚嫌青蓮藕淖泥蟠不已借問將比人古來誰得似

余愧食烟火衰顏強對爾

詠雪次韓文公詩韻

維仲春維肫漫空瑞雪來依依如有戀滾滾若逢催
潤物功還妙憑虛跡孰猜初祗颺片片久乃積堆堆
青帝應三讓玄冥宛再迴偷飛憐抵隙巧冒訝緣隈
壑慾充將滿巖危纍恐摧折枝為象箸拾級上瑤臺
鯨浪紛披拂鮫綃亂剪裁辨田週冀壤照室泛秦苔
嚼急牙生響承遲掌失按引羊渾灑竹噉鵲即投瑰
佛界莊清淨天心厭坳埃深高同奕奕遠近一皚皚
化米民優食論鹽國長財支願聞漸瀝騁目憶崔嵬

歷歷鴉棲曉殷殷馬踏雷捉無安石塵舉忘慶封杯
鳥怯埋巢盡僮疲掃徑開消融兼霖霖滲漉助栽培
龍燭驚銜遍螢書笑暎纔征途霏感柳糝閣落疑梅
凹凸彌縫了妍媸掩飾該麻衣悲掘閱紈扇歎徘徊
頃刻呈千態縱橫散九垓蒼茫波底月瀕洞劫前灰
較玉寧居次評花合作魁愁添貧屋壓明倍夕暉頽
薄水蹤旋滅翻風勢轉逐麥根膏素髮杏藥脹珠胎
綿見彈逾起山知倒不推吠羣越犬獠歌獨郢人哀
蠶漬欣占熟蝗藏賀弭災晶光侵紙帳寒意入金壘
谿棹王徽興庭聯謝蘊才孤鴻方悵望雙鳳忽毳毳

搏虎君能耳續貂我汰哉藐姑標絕俗嫫母強求媒
語括乾坤大思窮宇宙恢終然狂叫止適可嚇嬰孩
灘樵昨日之飲僕不得與今日灘樵携酒而僕

忝據右席卒飲作主

地底潛陽初動雷人間快樂共含杯與君今日成佳
話萬事從新叶吉來
灘翁佳釀擁梅深豈叟流涎費苦吟堪笑楓壺身只
一公榮做了又羊斟

分司書感

明時厚祿到華顛常懼顛蒙愧昔賢莫我敬王聞聖

柳尋集卷三
訓愛君如父誦家傳竿人弄頂猶爲地節婦剝肝豈
識天窮臘分司紆百感五更孤月照襟懸

立春日吟示葑館李侍郎子田

龍秀

坐念新春入悠然啓竹關斷冰猶擁壑晴旭已浮山
菜惜盤心剪花憐勝裏攀人情勞願佚天道往斯還
茆屋依呀谷蕭條忘禁城山寒鷄早踞籬豁虎橫行
濁酒從隣熟孤燈對客清存心知有地不復到浮名
葑館主人見余立春山居詩次韻相投復要余

和遂書此奉贈

戚聯非但已同案又同城世重通家好交深逐隊行

閱人吾亦老從宦子方清此日求詩意端知不爲名

孝田沈泰登

魯崇

將就直

園寢賦呈一律

林間物色若相期暖雨和風取次時滴滴浮嵐誰染
筆菲菲細草可登詩乳泉破凍通高笕啼鳥迎晴選
好枝從此山居幽事足故人南出莫歸遲

山雨吟病有懷諸僚對校之役遂用年前唱酬
韻賦呈斗室兼示左僚諸公仍乞瓊報

早雪融爲晝雨紛山居寥廓倍思君茅檐梅冷獨吟
病芸閣香溫誰校文末路齊名慚李杜高才華國讓
淵雲匏泉臘蟻應畱味寧復寬懷共一醺

東省共諸僚餞春拈唐詩韻

對酒春將盡何如送遠行
芳園回夢蝶深樹倦啼鶯
已分畱無術聊知餞有名
畫堂風雨散高柳係幽情
約諸僚遊流霞亭余與江右族叔乘小艇溯鷺

湖來會拈韻共賦

短檝孤篷溯漢洲
春江夾岸幾亭樓
此間未必橫肱窄
斯世元來過眼浮
見說漁人朝舉網
懸知仙侶晚同舟
茲行足數平生快
文酒如今第一流

與江右叔挈小舟由鷺湖溯上壘年前江遊韻

仍示諸僚共賦

出郭數三里馬隨芳草行
江低流未見沙遠眼先明
麥壟清風轉漁村夏景生
回頭問阿叔已忘市朝情
坐忘鞍馬倦清漢望無遙
帆腹西風滿江心午熱消
浴鳧聞櫓縮晴燕蹴波驕
最憶吹笙妙偏宜杏浦宵

浮生

浮生半百亦支離
閱見寰中許恠奇
多辱凡然同聖解
無訛古不異今思
哲人方拒生魚餉
何處將尋死馬醫
哭不可時回是笑
孤燈影裏且題詩

與諸公飲酒流霞亭有懷經山

蕭蕭遊子馬渺渺仙侶舟
燕燕及伯勞分飛不作儔

朝出南城門晚登江上樓樓下大江鳴日夕向西流
刺史良讌會杯盤錯看羞知君今何處飛蓋過坡州
行塵望不及我思悠復悠古來別離苦白盡人間頭
作詩欲寄君復恐添客愁

列聖御製續印告完二十四日將進書開局以後
閣僚與是役者夙入暮退無日或曠余與斗室
諸長僚五日一赴迄今甲戌季夏二十日而止
暮月周旋行將散矣聊述抒感

身心塵刹奉董役已年餘編印功垂就公私感可書
知無終事再將奈會時疎道合通 君友凡人各有

初

途中雜咏

沙際行尋舊涉痕中冷浦浸拜峯根却憐霧鎖橫塘
柳若個人家是斧村
二水明涵斗峴天萬山晴曬廣陵烟一般是走黃驪
道江北江南並可憐
暫辭鞍馬載扁舟百丈徐牽湖上游今夜不知何處
宿最先涼意似清秋

江外望趨揖山

隔水穹然起遙瞻喜可知天晴山色了雲過壑陰移

柳亭集卷三
迥立高明域安居積累基嚴恭論氣象盛德古來誰

自香谷舟下京城

一別鄉園百種愁滄波萬頃倚篷樓心知猿鶴還相
謂目送鼃鼃自在游世路何如懸磴險年光無奈急
灘流江村猶是紅塵外不妨西風又打頭

過華陽亭

婆娑山色綠婆娑影入梨湖鏡裏波風景不殊初見
日白頭當復幾回過

途上木偶

短木偶人腹有文文云天下大將軍虛名慣是人間

世此日無心更笑君

郊店偶成

出郊還待客閑步酒罏過茅屋午暉正野橋春水多
浮雲遮不了堆雪欲如何却恠平生事心身每兩科

平邱店舍午飯

去年休歇處秣馬待新炊野色斜通戶江聲迥匝籬
蔬賢朝肉飽枕較夜床宜臨發重徐步聊圓未了詩

賦鵝

骨不任鑢錫皮不材鞞鞢釭膏不給燃俎肉不登腓
不紵項自戾不擠脚似排有羽飛不高與律聲不諧

柳泉集 卷三
靈寶不忿殺於陵不屑哇陸不儷烏鵲水不食虫鮭
其白白鋪綿其黃黃染槐其鳴自呼名噤戛而嚶呢
其一向天歌其羣拊翅偕笙簫嬌讓鶯鼓吹嚷爭蛙
掌紅胼肅鵠頂赭突旋蝸善啞匾味呀能鬪頑性乖
泛卽弄萍蒲棲非藉荆柴驚翩強學鴻怒嚙反類騶
短尻舵浮岸光腦土經霾喧聒俄尋鬧斂靜忽持齋
乳雖視羲娥舞豈嬉馮媧壇血旱是厄山罽寒可挨
長親鴨睡欄自遠鶻巢崖王郎徵異夢管生換細楷
且願資國稅慎莫惱隣街醜絕庾書係怪甚吳苑埋
拗笑烹瓠誤釀稱下酒佳畜堪比鵬籠愛亦宜鸚牌

寧辭處園池時復近庭階波撥踏成紋泥行痕不叉
警盜能可使辟癩功足懷五幟昔勅軒三軍夜收淮
聲差雄雌辨態傲子母皆誰謂身具翼疑無筋束骸
情豢稻梁味眠貪草水涯圓眼酷肖錢垂胷巧名釵
刷翻雪霜皎叫渾風雨潛縱乏鳴雁姿恥入羣鷄嗜
伏嘴拱毯毳浴脛凌迥瀼吐吞臆生嗔低昂頭似俳
渴不避濁淖飢不擇枯芟肥重嘲笨伯潔白愁越娃
舒行自成列長趨若被差大抵於射工威猶獸之豺
甘帶過螂蛆啖若啞稻蕪是名曰倉可養在門前洼
常常鳴逼窓鼓奮生急颿我有晉人癖見輒喜眸揩

爲詩狀其德肯使凡鳥儕爲壺象其頸繫以青絲網

七夕

纖月須臾漸隱輝蟲聲涼意滿庭闈銀河夜轉雙星
合金并秋迴一葉飛半載光陰何忽忽百年心事獨
依依真如蟾子傳人巧膜拜要當換拙歸

溪上折取楓枝有感

絳枝攀取妙香秋緬憶金剛竹老遊此葉如今堪裹

淚教誰藏硯與名樓

丙寅秋竹石遊金剛以楓葉寄
余及屐翁屐翁時觀察北關構

一樓適成遂以紅葉名之余摸其葉于帖爲詩與跋
名曰紅葉傳照因以其葉裹藏于玉壺山房硯匣至
壞今不也

擬古次張曲江感遇詩韻

燦燦畦中菊不自言秀潔后皇賦厥初爲與風霜節
羣芳競春暉葳蕤亦可悅可悅諒不同寧辭幽士折
綠竹不知霜勁氣專秋清老柏森然對似與通其情
倒生寧有知一氣抱元精攬此增太息誰復鑑余誠
寒月出東方人天同照見不知四海外而復有赤縣
百年有定期長生非所羨寸心願同明萬劫不受變
霜林有擾鶴朝暮來棲息垂領伺僮旨累然風塵色
聲聞雖于天慙負如輪翼噫猶鳳之族莫爭腐鼠食
天風振鳴擗高桑無附枝沃若忽已變不飛復何爲

人生信可念從古亦如斯逝者日何積茫然不可知
所嗟遲暮境彷徨猶路歧

猥猥競人肉騶虞避不顧鳳鳥翔而遠鳴鴉萃棘樹
天物豈無則所習良可懼凡百同胞子情亦具好惡
鷄鳴起孜孜尚慎爾所慕

荆卿默而逃不止俠士流淮陰非長者何羞噲與儔
砥玉有定質高價寧自求耿耿處兩間獨抱終身憂
憂來不可忘外馳內安修孟舍似曾氏懷哉心悠悠
霜露滿天地渺然增所思衆艸正零落叢菊獨葳蕤
葳蕤亦何喜零落足代悲人生各有命宰者問爲誰

古人諒可企其時不可追所以後人行不與古道期
我志竟安就歲月徒委遲甫田不可田三歎下書帷

中秋溪上步月

秋石幽幽秋水明秋山寂寂見秋清一年良夜中秋
節秋士沿溪踏月行

再從姪孟汝

教根

第別黃州使君

急管哀絃訴夜長歌聲嗚咽掣愁腸蘭衰菊秀西州
路明發行人鬢已霜

不成商婦曳村裙伊昔喉音駐碧雲相見爲煩傳一
語白頭無賴杜司勳

精舍謾吟

誦書擬一部吟詩擬千首每覺上山心下山不免負
新月掛西峯熹微和雪影寥寥孤犬吠客過松間徑
頑冰藉陰壑鼻屨誠可畏問當幾何時陽德日煒煒
夜坐次農巖韻依刻燭令石閒稱頭痛則罰一

椀井泐

惘然歲云暮疎髮奈西風詞賦心仍倦乾坤眼獨空
長鳴憐櫪馬冥舉羨雲鴻昔哲無從見幽懷誰與同
聞乞兒聲

喚爺爺不聞覓孃孃不見爺孃尙不知他人肯回眄

回眄亦何益自分溝中轉有口無入粒有身無掛絲
啼啼眼有水水出無斷時珠珠結爲冰瑩瑩堆藁茲
暮雪何慘慘晨風何烈烈指直握不偻膚皺觸卽裂
豈伊骨肉形實空而湧穴不用錢抵山不用縑易樹
殘飯及弊褐生死立判路狗彘畜不如厥初誰所賦
我行忽遇爾萬箭攢中心蒼天高復高白日陰復陰
酸聲爾何辜殊愧軒車音

入壺舍

暫與家人別來覓山中伴山中無個事不知山日短
茅堂纔數楹怪我貪停宿知者謂知之寧知君子腹

晚磯索胡椒

明珠那見救寒人愛汝温中是藥珍
產異秦巴功略似枝分南北性隨親
石家泥壁緣誇富屈子懷精豈媚神
問訊河魚今已否非伊貽握贈之辛

次琶西老人韻

鼎鼎光陰又及春玉壺雲物漸宜人
冰銷礪道鳴泉細雨過溪橋臥柳新
即喜郵筒驚寂寞還愁藥裹費精神
節宣須藉陽和力佇見花間枉綺輪

送平泉李尚書元汝義甲按北關

北土訐訐刺史榮春風攬轡意澄清
朝廷八座新增

色幕府參軍舊有聲弓馬才荒疎
牧圉蓼貂產竭弊民生憂虞尚視西南
急誦子前言贈子行

古意

羲車逼崦嵫我行猶紫陌百年忽反顧
逝日何處積老情睠城市初心負竹帛
門閭護高大市童憐棨戟子陵自有竿
靈運豈無屐古今諒不異駑駿相什百
帳望春山色暎深杯中碧

日高始起眠頓頓飯粥喫遇有能棋者
手法頗相敵棋罷復對卷宛然古人覲
古人豈畱形心會在寂寂餘情及翰墨
遊戲隨所適劣詩聊勸酒顛書或揭壁

入夜良伴集坐深燈火剔雅謔童殺出妙理秋毫析
味茲飫芻豢聽新洗箏笛鷄鳴始就臥如是爲課績
此樂未曾有恍然思所歷緣病得此樂詎非天意錫
聞餓莩在塗賦而志感

貧富休言命也夫天生人不與人殊衣鶉色菜渠何
罪飯稻羹魚我信愚千里顛連無定向中遠僵仆有
誰扶酸心爲念同胞義兔死知悲尙愧狐

夢遇李文翼晤語如常皆時事也

相國靈何在砥山宿草荒丁寧依夢寐歎洽若平常
王室彌綸苦人間翰墨香祇今殄瘁痛餘淚尙棲眶

病裏春寒

三月披裘尙怯寒屏間厭厭晝眠殘今年花事知無
與活到明春可細看

一回呻熱一回寒嗟歎非因老喘殘自我勤成壺舍
後花開曾許別人看

楓皋集卷之三

楓皋集卷之四目錄

詩

高坐

聞淵泉叔舟歸廣陵山居賦呈

奉寄耽羅伯韓近之象默兼賀花甲

隣人送詩軸乞評因次其韻

雨中次兒輩韻二首

菊塢來訪與之共賦

次兒子和陶詩韻奉呈竹里族叔

新晴

贈石閒 二首

次趙竹陰先生贈清陰先祖詩奉呈君素

松石三絕句

與石閒詠月

數日晴佳偶書所見兼申別懷呈君受

述病

論詩贈人

不告

暮雪

次蓉城李天民懿詰

南郎久淳夜次精舍壁間韻余亦為賦示之

惠慶宮挽章 五首

贈元根赴任任實

書便面贈桐漁李尚書 相璜

種竹

石假山五古書贈經山直閣

春雨有懷

次大隱樓軸中韻呈海石金相國 載瓚 ○ 三首

雨中

次韓近之韻

寄贈關北按使李元汝

夜拈杜韻與客共賦

次韓昌黎秋懷韻 四首

哭李尚書 晁膺○三首

斗室勸余塗窓既塗謾賦古體一篇却呈

次小華李直閣 光文 詠斗室畫松便面韻

過隣洞歸路率得一聯云落景明山雪孤烟冷

草廬天民勸足成遂書此奉呈石閒老友

楊津打魚贈鄭明府 漪

次兒輩漫吟韻寄菊隱

夜集斗室履翁成長句題便面見贈明朝和其

韻亦書便面奉酬

和西園

昔訓

斗室見月寄詩率爾次韻

讀泊翁長篇率吟代評

迎華亭

華城途中 二首

重題安時赫赤壁帖

秋日同履翁竹石遊在澗亭履翁以亭名命韻

共賦

夜長

小樓秋事

寫百筍與道兒

和陶飲酒韻 十首

試筆謾賦近體

夢問

對雪

途上漫吟

火田行

江行 五首

騎牛

拈荆川韻

黃驪途中 二首

紫浦途中

自梨湖溯楊花

東郭路上口占

路傍羣塚

贈匡山元義民有永

石榴

夾澗亭分韻得空字

送趙胤卿萬永書狀赴瀋陽

淵泉叔從余借甲冑又云紙乏家人索一張不得應率賦呈

酒畱菊隱

江遊同竹里江右淵泉三叔北海趙侍郎鍾永

西漁賦

翌日復泛

宿石瓊樓三首

次斗室咏荷

送李葑館侍郎觀浪營

論文示天民

次蓮社韻

西園屬目有感

老去

漫詠

壺中秋晚

頌酒爲石閒

早起見山雪戲吟

放慵

斗室昨疊前韻投示蓋喜水仙出芽也僕與斗室生年癡長一齒水仙之芽其出又遲一日輒又續貂恭俟斤政

己卯元月三日書囑晚悟老人丐仙料

齋宿慶熙宮內閣漫賦示檢書諸君

朝退過舊闕

次迨根足夢作韻

聞李甥穉圭手種花樹用韋蘇州韻賦示

橋上望見李甥穉圭種樹園中歸而賦示

山館與諸生共賦 二首

疊用前韻 二首

雨夕與李檢書熙耆李引儀明斗共賦

僕上年丐竹數根種於南牕之下經歲而茂脩

竿密葉儼然成林心喜欲賦久而未就是日

新晴偶閱擊壤集有高竹八首遂縱筆次其

韻非曰能詩聊志愛竹之心與凡同嗜者看

時已卯五月二十八日也

栽竹了次韓吏部詠筍韻

夜吟示菊隱 三首

石田茅屋歌戲贈金生天叙

贈金宇夏

次李子田韻同寄淵泉族叔北漢煉藥之所

送殷山縣監朴公益來謙

華城三首

過李友新老在秀 鄉居 二首

過牛陂二憂相國故亭

衿川書院

望讓寧大君祠

重遊奉元寺

又與諸友共賦三首

送孝田宰天安

送三行人權景羲敦仁

梅下共元李二生次山谷韻

春夜宿玉壺精舍

寓吟

春朝漫吟

春雨有感次宋人韻奉呈斗室

寄石閒捕魚舟次

李郎肯愚將遊嶺南賦贈

內舍重修畢詩以志喜

四月十三夕宿壺舍 十二首

石閒有書道元根願解腰間墨綬歸閒田讀十年書云戲賦絕句反其意蓋亦寓勉也 二首

玉壺夜聽風雨

伊川倅柳和之惠石鼎遂次退之石鼎聯句韻

以謝之

贈明遠天民義民

次泊翁韻

直廬苦熱答朴學士眉皓 綺壽 見寄韻

偶題

詠史 二首

楓皋集卷之四

詩

高坐

高坐茅亭意窅然時時擡首望青天古人功業皆閒
氣今世文章竟惡緣花下有樽春似海山中無客日
如年深知物化同歸幻蝴蝶莊周共一眠

聞淵泉叔舟歸廣陵山居賦呈

峽雨漲新波歸舟渺雲際兩岸芳草多晴眺幾停棹
念公自還家非是出人世云何余矯領忽如矰翮逝
高田有秀麥深山有叢桂秀熟事無餘叢華心自繫

爲問高臥後記否紅塵內

奉寄耽羅伯韓近之

象默

兼賀花甲

問訊耽羅伯平安坐枳城宦遊雙鬢皓治法一心清
蚤俗宣王化蠙琛勸下誠驂騶千谷滿橘柚四林明
海晏無波警堂深有誦聲郵筒祝花甲南極耀秋精

隣人送詩軸乞評因次其韻

十日荆關客少經孤筇時與老松停櫻膚燁燁烘雲
赤梅頰漓漓溜雨青鹿性鷗盟隨地見鼠肝蟲臂任
天聽近來認得方便路未必齧糟獨忘形

雨中次兒輩韻

聽與淋鈴慣無聲還索然客人稀比日睡意抵長年
刷羽簷來雀流商樹去蟬可忘北林好飛瀑屋東偏
不問風何自垂如天漏然浮雲疑蜀日積水恐堯年
茆腐朝生菌蛙誼暮代蟬兩南猶赤地極備亦胡偏

菊塢來訪與之共賦

甕釀醱醅久爲君浮大白人生貴相詡良辰足可惜
荆妻解飲食芻豢惟君適左右羅服用所求惟君役
况是積雨霽天光開澄碧彈琴詠新詩優哉永今夕
歡娛披真襟願君終莫逆

次兒子和陶詩韻奉呈竹里族叔

端居送重陽慨然憂思生寒暑忽相代夏秋誰所名
哀壑夕陰結霜林丹葉明歸鴻渺天末雲斷猶餘聲
徘徊步廣庭惜此遲暮齡前脩迹已沈幽抱誰與傾
所懼非所辱所悅非所榮吾生亦有初非欲殊人情
嗚呼聞道晚白首無所成

新晴

半日翻盆雨寧知到夕晴積雲何處散圓月不勝明
仰樹逢疎滴循除送暗聲寂然秋意動紋簟太涼生

贈石閒

君筆阿房出蜀山吾思灞上閉函關羽毛自致雲霄

外行輩寧隨伯仲間癡慾貪嗔都証果風花月露不
成閒祇今四十年相對弄斧門前幾汗顏
逕入君居復轉斜蒼陰合處卽儂家百尋楡出千章
木萬本楓多二月花泉味應如無錫溜山光何減赤
城霞春來準擬相携去一緇芒鞋代小車

次趙竹陰先生贈清陰先祖詩奉呈君素

并序

夜讀竹陰集有贈清陰先祖詩而其首句云
一隣分占半山隈宛然吾輩近日相從也遂
敬用其句而步韻待朝奉呈吾輩後生鹵莽
孱眇不堪爲役於先祖然追逐情好不愧昔

人此亦足以自多且吾輩後承又能不失舊
諛卜隣源源如今日則豈非天下之希事乎
敢以是為祝

一隣分占半山隈鞵印縱橫石逕苔林杏君先三紀

種君素居八判洞已三十年柴荆我後十年開余築玉壺亦已十稔浮生契

闊休多辨衰世風流有自來兩祖監臨應悅豫雲仍
不替日相陪

松石三絕句

屏去庭中列惟存松與石朝來倚檻看不見風霜跡
小松未三尺屈曲像龍起憶我復何人他年風雨裏

故人贈三石東海携奇產其一最難得宛然具天眼

與石閒詠月

皎皎娟娟滿天地天無雲氣地無風不知流照何山
外祇意專明此澗中空影然疑瀛海水飄香茫渺廣
寒宮一年佳節中秋夜問月停杯與子同

數日晴佳偶書所見兼申別懷呈君受

秋晴開氣色高宇碧寥寥山淨雨痕過塘澄雲影消
荷移香與菊蟲續語多蝟此日聞君去離情不禁搖
述病

世間病種四百四無病無痰而為祟痰是肺津滋榮

林是集 卷四
衛常時亦與血氣類爲火所乘方猖獗癩人殺人無
不至所以醫家有切喻當時孟德身非二他人百証
且勿論我生苦此自墮地孩提患膿領杯核稍長傷
食膈芒刺二十三十隨年加積聚窠囊常內熨蟲與
半夏服無靈稜朮不售鵝翎試四十之後轉成癩况
過五旬添衰悴三月四月天氣和小暑大暑炎風熾
一年除此百日餘外體粗康內通利清酒將炙喫生
冷生冷是吾性所嗜白露旣零金飈動人言欲蘇我
病自直到明春清明節千奇百怪來相戲如此年年
作歲課今年倍劇去年視腿牽足麻行步倦握固指

酸不聽臂失前遺後健於忘包絡冲冲如驚悸懊懣
不已爲眩暈兩目眈眈若霧墜最是夜嗽人可堪辛
苦萬端不得寐枕上自聽嘈嘈來漸覺喘喘衝口鼻
大鉅相引不暫息誰將綿塞喉門悶蹶然起坐欲唾
出咯咯作聲氣力肆氣摧力盡咯不出脅坼胃裂眼
垂淚百般無奈不出何性命真如在造次縱吐涎水
滿虎子寧破頑塊據鼻屢却將茶湯按奔突干羽解
圍差足譬迫詰支吾天欲曙百骸弛頹倒似醉梨柿
滿前看烏喙問爾何與盛德事不是元化試麻肺定
須長沙探金櫃嗚呼二子不可遇此生此世無穩睡

論詩贈人

古詩如合樂律呂相隔八今詩多不平應候吟蛩蝻
太和囿鳥獸翔舞節鳴戛微生苦草露流商自噍殺
昔聖以為教汚隆世可察驟歌憂晉曠止觀悅吳札
情性雖邇密風氣彌塊北寄言操觚子慎莫耽小黠
不告

明月之明皎如燭白雪之白淨於玉五更睡起獨登
樓四顧悄悄延寒矚淨者何因為身相皎兮勿愧通
心曲前有武鄉後長源暨王文成鼎三足商量中間
幾個賢不是乘啓是車屬藐小猶能受明命十死萬

一慕芳躅念念昭昭証明白傍人莫問矢不告

暮雪

山比瑤邱不可名樹如金谷倍應明明年年賦賞溪村
雪辭竭猶餘未盡情

次蓉城李天民懿詰

急景連風雪寒聲起夕林支離三月病牢落百年心
酒馥通梅細書燈照客深論文忘夜久捉鼻更新吟
南郎久淳夜次精舍壁間韻余亦為賦示之

爾自嘉林至朝敲隱舍關獨尋冬後約共對雨中山
冰玉須交暎絲蘿本互攀老夫狂喜甚春物又方還

惠慶宮挽章

慈情戀觀華至樂在雲天鼎汜朝龍馭緱岑佇鶴仙
功留宗國大德冠后妃賢敢忘恩庥賜於乎七十年
厥儀何日返投涕伏思之誠盡 离明攝行餘 英
考知艱憂終暝雪 神聖繼含飴功德 東朝筆千
秋卓不移

皇祖褒言不亦神源高百行慶流身果然佳婦仍賢
母是以 寧王又聖人長樂揚徽隆擬地 文孫篤
祐降符辰更看衣尺裁總制磐石縣瓜竟孰因
徽音緬想舊經過至慟無辭矧敢多倫性兩全斯聖

已滄桑百閱奈天何虞嬪實贊重華攝周雅先推摯
仲歌七十二年如一日誰將彤筆畫羲娥

雲旌冉冉向汾川萬姓環瞻一廓然復土同封方魯
祔 寧王定制自灤遷連城柳色還春日滿殿花光
異卯年月出衣冠隣健寢惟三陟降慰終天

贈元根赴任任實

汝本疎於治湖南作吏新絃歌寧有術芻牧必勞神
事上恭非諂臨民敬是仁昔吾諸父覩心法在清循
書便面贈桐漁李尚書 相璜
金玉不同章蘭菊不同藥使物而有知應復相憐已

君子重所與尚友千古士千古夔猶然同時那不喜
大夫有令名質文夙具美孝友篤其原忠欵著素履
立言妙一世幹蠱王國紀蘭臺昔并武高義感不鄙
情性殊所安流通有至理周旋三十年敦昭無改始
阿好子不能過情吾所恥永念生季世無事古道擬
惟有兩心照庶幾淡如水如今共皓首不知誰後死
未死重勉勉後人願式似

種竹

盤屈龍蛇入土深脩竿密葉儼成林迎風夜聽玲瓏
玉布地朝看瑣碎金繁族分形均苦節高姿近道自

虛心渭川千畝何須羨淇澳詩人誦德音

石假山五古書贈經山直閣

累石像真山却向庭心起隨累隨爲形巖洞生造次
譬如畫物者初但臨空紙執毫想其態現眼卽成指
佳卉種便生小松移不死幽處悅雲氣蒼翠入隱几
我方托膏肓朝暮對之喜有客謂太拙火速還剗毀
峻極不及檐名山焉用彼我笑如不聞君自未明理
試見南山色不在此窓裏

春雨有懷

細和朝烟着柳枝一年春意惹絲絲渾因俗事無閒

日開遍庭花了不知

次大隱樓軸中韻呈海石金相國

載瓚○并序

丙子初夏元輔海石公方遯于德隱之江墅
及健李相公與左揆小波韓公同舟訪焉竟
日夜跌宕相與聯句志遊履翁太史賦近體
又次聯句韻以獻之三公復相和成軸甚盛
事也祖淳從海石公求寓目公許之遂要拚
和辭雖俚公命不敢不膺云爾

渚上漁樵面不生沙邊鷗鷺意相迎公今欲把三公
換十里江山臥太平

波心收網夕潮生樓底移樽霽月迎五夜星文應有
驗台階光接壽躔平

扁舟三老溯清風大隱樓高杏浦東人世閒忙朝野
異江湖憂樂古今同亦知白鳥盟猶在恐遣蒼生望
遂空孤夢直隨明月去汀洲繞遍夏簾櫳

雨中

聲低聲急苦淋漓三日青山失不知栽竹土鬆抽筍
速烹茶薪濕出烟遲水田夏木王摩詰清簟疎簾杜
拾遺小閣沈吟拈彩筆今人但擬古人詩

次韓近之韻

誰不當年讀古書自量何事聖賢如且休恠我獨探
虎常欲勸君同捨魚白髮無情人可怨青雲努力計
曾疎山房雨宿爐香燼話及平生悵有餘

寄贈關北按使李元汝

送君按北藩周歲有四月藩司盛繁華百供無一闕
佳人妙竽瑟健兒威旌鉞况乃登樓望川陸有超忽
衆情競就此回翔樂閒歇如何問來使君獨改顏髮
良由經濟心寤寐苦兀兀制勝繹遠猷歲事無倉卒
豈弟雖神扶菁華懼易竭宿雨捲山椒吟蟬厲清樾
時物感中情契闊增恍惚德音不可忘千里不可越

何當共摻手歡言解醒暍所慙嵇與呂相思命駕發
夜拈杜韻與客共賦

失學慚茅塞傷時念棘艱癡誰粘駐日愚欲畚移山
詩語蟲同苦顛毛葉與斑星河橫耿耿悄對竹簾閒

次韓昌黎秋懷韻

少也未度力狂圖千古凌中年遂濩落癡如秋後蠅
紅埃滿面目識者宜見憎鳳凰翔萬仞燕雀巢檐稜
吞舟或因蟻神物不可罾嗚呼聖垂言人各有一能
披書未罄卷紙窓忽已暗窓暗當復明眼花真可憾
花暈猶待拭心雲瞰非瞰繪繡文出素玄酒旨在淡

至妙莫如拙言傲意非濫萬歲會有窮窮則瞥眖
駿馬不常驟虛舟不常纜物物理雖殊究竟一槩勘
曾聞石崇富本無資甄飢

白雲飛南峰黃葉墜西軒勁飈侮蔑甚上下劇逐奔
倚戶漫寓矚默默忘晤言忽見盆中菊秀色當函前
朝爲元亮採夕代靈均餐餐餐不成飽誦古詩數篇
作者况相對不覺歲去千胡爲詩上語奇潔含辛酸
酸辛觸所感不如置而眠眠時神熙熙薄愛羲皇年
鵝雛啄練實鴟甘腐鼠乾燕石瞞瞞者時乃混琅玕
別人泣荆璞孩童攫黍團借問老先生夫子何所安

先生啞不膺使我涕沈瀾昨夢遇仙客遺我盤中丸
倘將夢作真如馬脫羈鞍

哭李尚書

晁膺

百身難贖昔人詩和淚吟風豈我私早歲圭璋廊廟
待晚來山斗士林推雲空水落方真面虎逝龍亡奈
此悲秋日江樓扶病話至誠憂愛上蒼知

篤行孤操衆所知風流儒雅况堪師承家冰蘖青氈
在衛道滄洲白髮滋凍叟指天曾列榜坡公過海尚
傳詩如今萬事成灰日窮鬼挪揄轉可悲
欣戚榮枯主者誰公歸今日豈曾期終拋 聖代經

綸手但博湖民父母思琴裏峨洋無好友杯間啁晰
有纖兒寢門殘照吞聲罷哀誅抽腸不愧辭

斗室勸余塗窓既塗漫賦古體一篇却呈

自余入此室于今滿八禩南北七扇窓初不易塗紙
塵煤經久濕文理成黯紫觸破但隨補千創似痕痛
寢處慣其間久仍忘陋矣每值天陰時烟霞生眼裏
字畫及枰道歧分或疊索偃僂藉鬢隸辛苦董辨視
故猶不自覺祇道衰相耳斗翁昨見枉談吐正旖旎
忽然向窓哂顧余以手指公須亟改爲麤黑何至是
知公平昔操不欲近華靡華靡固可病光明寧不美

又恐人不諒貽譏在布被矧惟瑾塞義茲當冬令始
惕余聞之罷致謝便長跪豈無篋中儲任他殆甚已
直緣性荒懶圖慮不及此感君言有味心動口卽唯
但恨寒天景妨功迫濛汜耿耿睡未穩却先高春起
裁紙兼煎膠奔走役僕婢關關動樞響旋旋灑清水
去舊而卽新皎潔勝紋綺開闢固自如宵晝判轉徙
朝暾適映射玲瓏不可擬既復淨掃室分序奠案几
高坐讀黃卷了了細可喜隔紗窺閣梅歷歷數珠藥
碁伴自外來驚詫謂盡技皂隸相竊語劇怪公心侈
敲枕試靜念舉此足題彼小則譬人心罔念暴棄恥

一日能克復明命便顧諟季路去佩玃子隱為名士
大而如人國亂極必思理政度盡疵疢彝則將晦否
罷飲忽聞姜斷篋遽見半風雷奮頃刻百怪悉消弭
於乎二后勇炳烺耀青史大抵塗窓事瑣屑不堪紀
張皇况為詩多由習氣使仁智有相近裁擇待君子
擲管掃長幅鬪奇誇弔詭聞君酒向熟倘不覆甌以
次小華李直閣 光文 詠斗室畫松便面韻
休論似否是為松游戲神情寫墨濃筆下韓生無俗
馬人中蘇子即真龍知君故有凌空意愧我殊非出
世容歸去北山山澗畔寒濤起處共停筇

過隣洞歸路率得一聯云落景明山雪孤烟冷
草廬天民勸足成遂書此奉呈石間老友

灣回溪上路吟望緩驅驢落景明山雪孤烟冷草廬
誰家梅發後前夜酒生初隣叟呻疴久非吾阻奉書

楊津打魚贈鄭明府 漪

芳草連堤雨捲初江雲漏日晚風疎楊花渡口桃花
水一半金鱗是鱖魚

次兒輩謾吟韻寄菊隱

花枝欲動草痕多吹徹東風雨更過野馬晴迷春郭
曉江豚夜逆海門波行披白袷澄溪暖坐捲湘簾碧

岫峨霧眼猶堪烟景對驚人佳句奈君何

夜集斗室履翁成長句題便面見贈明朝和其

韻亦書便面奉酬

庚戌其日丁丑春穀雨應節飛蕭園蕭園主人斗室
老精華燁燁貌温温座上褻然履翁李文章餘事兼
三尊薦推煦陶如不及寵諸損友屈駟軒吾家名士
有兩叔竹里江右才且賢寧野休休慕古態蒞館潑
潑非凡鱗天生荳溪對北海荀家鳴鶴士龍雲高樓
日斜花枝近風吹綠蟻沿綺樽醉間磊落天真見將
倒未倒羣玉山畫筵聯題豈偶爾序齒叩籌極歡然

履叟于鬚復目動三十六韻許闔分隣鷄喔喔燭屢
換相顧俱非少壯顏未說餘生此會幾莫負壺中酒
一巡壺中之期我爲政問我是誰字士源

和西園

臯陶擁篲掃掃天有何道安石捨妓出出山爲小草
漁父勸啜舖憫然三閭槁侏儒短亦飽馮唐材已老
悠悠緬千古茫昧不可討變蟄各以時聞道莫如早
不朽自有存金玉非所寶

昔訓

聖人昔有訓佞殆鄭聲淫彼何渝薄子鳥啾復蟲吟

際出禪革間神州遂陸沈誤世言猶輕侮聖罪更深
巧舌雖如簧終歸獸與禽有虎當不食士子肯同襟
我欲掩兩耳不聞衰世音

斗室見月寄詩率爾次韻

露頂松壇風拂鬚歌殘如意打空壺天時滾滾相推
斂人事紛紛孰有無盆竹眼疎太生瘦庭蕉心闊易
為腴西隣老友呈狂態月下傳筒筆勢麤

讀泊翁長篇率嗟代評

攪海翻江手段強誰能八十此鷓鴣張劔南萬首差相
敵光燄猶應讓許長

迎華亭

綠樹紅亭半夕陽藕花無數號錢塘行過萬石渠前
路水氣渾如八月涼

華城途中

柳梢搖曳水風斜綺堞丹樓漾晚霞寄語分司勤護
隸先王不是愛蓮花

早稻侵黃晚稻垂木棉莖短尚堪絲向來霖雨緣何
極終是蒼穹眷子遺

重題安時赫赤壁帖 并序

往年夜坐時赫在傍偶取禿筆書赤壁賦與

之蓋不虞其莊嚴至此也赫亦好事者乎請
更識如此丁丑七夕

秃毫胡亂字塗鴉此日重看拙莫加多事煩渠裝補
力恰如僧壁對籠紗

秋日同履翁竹石遊在澗亭履翁以亭名命韻

共賦

爲人性癖愛山澗不啻其口悅芻豢况復邇來係仕
宦情同江湖處鳧鴈竭向城北行慢慢徐氏名亭間
曾慣牛耳之溪亭下環白石磷磷水及鼈森如戟攢
又甲擲道峯三角青糾縵山廚逡巡午飧辨伏雌初

肥栗駭綻石上頽然解裙襜媿媿笑語忘日晏紅塵
十里隔橋棧天機清妙誰復間人生有知殊鵬鷁百
年圖名等夢幻安得凡蹤自此鏟永樂仁智無憂患

夜長

夜長添漏水人定湧樓臺細箔微波動枯林驟雨來
黃花催我句明月勸君杯兩地今宵意迢迢不可裁

小樓秋事

秋樓耐日尚如年影轉庭梧晝闐然閑閱道書慵更
甚自澆稚菊到塔前

寫百筍與道兒

滿幅淋漓寫竹胎叢叢矗矗勢雄哉題詩却與吾兒
祝一本苞成萬挺來

和陶飲酒韻

淵明何許人人皆慕之我亦具耳目恨未生並時
秋暉淨山水結廬適在茲盛年逝莫駐飲酒復何疑
豈無時殺美螯當左手持
人受天地中應識天地情萬物循自然其妙在難名
紛紛較利害無乃忝所生世譽不足悅獨行非可驚
三杯適太和大道以自成

醒者謂醉非醉不謂醒是我思醒得譽無異醉取毀

底竟非存實亡羊均我爾不見掩體具毳葛比羅綺
明月誰所作皎然冰玉姿吳剛復何意夜夜斫桂枝
萬劫見如新爲物真太奇對此不勸觴有酒亦徒爲
攫身願抱取長醉以不羈
白髮鑷又生紅塵撥不開取我罇中酒瀉我千古懷
古今非邈絕化翁喜弄乖桑扈或啄粟鷓鴣失梧棲
所以賢達人長願醉如泥平生任懶惰十事九無諧
唯有蘊真心不作七聖迷迷者卽自遠何曾道迂迴
穹蒼詎無心風雨愜有道吹噓從草穉成就及葉老
蚩蚩氓胥動伊昔怨苗槁寧測造化心終然百穀好

君王致上瑞，蔀屋堆至寶。狂喜爲酣歌，歡聲散八表。
林下雨不期，翩翩清士至。雅吐揚芳芬，未飲心先醉。
自擬羲皇上，寧安魯連次。依身道德藪，雲視富與貴。
怡然且助歡，我有經春味。

酒中常有祝，蔚然青山宅。檐巢異禽抱，園交麝麀跡。
隣人問奇字，女奴誦三百六十七。長兒孫鬢髭而頰白，
此事諒不費天意。豈終惜

酒不生，亦可生。可不飲得養和莫，此然伐性良所惑。
世情無古今，天時有啓塞。齊相解烹鮮，持醇定開國。
編迫恠三閭，獨醒懷默默。

伊昔攻詩文，寤寐思造真。同人謬見賞，往往推古醇。
蹉跎衰境逼，苦舊不化新。六朝望已眇，况乃睨先秦。
商飈動林顏，宿雨洗煩塵。露蟬厲清響，停雲懷亦勤。
秋思日邁深，杯酌聊相親。醺然對架書，解醒漱芳津。
會心便叫絕，不覺遺簪巾。雖余鹵且莽，猶足知古人。

試筆漫賦近體

倏忽人間世，無端及孟冬。精疲知日促，髮短剩霜濃。
鄉舍憑圖見，林朋待夢從。棲遲悲枳鳳，神變愧雲龍。
散悶摸脩竹，忘年種小松。舊房垂紙帳，書帙漫橫縱。

夢問

對覺謂之夢其故難究詰似真亦似妄非幻亦非實
若是妄與幻奚占凶與吉若是實與真卽與覺爲一
華胥果何國軒轅得資術秦繆及趙簡天遊何賴疾
尼父見周公何無言語述何能審不謬殷宗肖良弼
茲皆古所傳真妄誰甲乙或言晝結想宵寐遇之必
或言其於覺如影爲形匹如我所思惟其因亦微密
所夢或非情不可想爲律還有無夢時非如影隨日
凡人應事物心爲眼之帥瞑則雖無見而物自具悉
精神隨呼吸倏忽有蓄溢所以適萬里身不離此室
所以十百年閱歷頃倉卒所以其作爲如得復如失

覺與非覺間理有通或窒境由卽地生情以本然出
我亦多夢者願從聖神質

對雪

綏綏乘雨下丈尺表呈祥玉美瑕生指花明老謝光
定無如是艷疑有自然香賦詠橫今古寧窺造物藏

途上漫吟

秣馬田間舍春山雨過初丈夫耕白水穉女摘青蔬
勞作非無已安閒自有餘不知錦官廟何似鹿門居

火田行

崩劣高山千萬丈絕巔處處燒痕上健牛蹄怯耕不

得田叟携鋤日獨往清晨撥土到山曠石多土少腫
手掌掌腫腰酸不自憐但願投黍秋穰穰去年上年
雨水多和土和苗一洗盪力盡心摧天冥冥匍匐歸
來食拾橡拾橡充食饑不饑饑死饑活猶閒想兩年
欠稅徵白地官庭限日逢笞杖死是容易錢何從啼
啼無處訴冤枉問汝胡不樂土生忍痛年年斲枯壤
枯壤枯壤猶多黍溥天何地無官長

江行

江上青山千萬重春來雲樹倍深濃如何脫却塵衫
去關個柴門對好峯

岡坂漫漫草色齊春雲黯淡壓羈低孤墳尋到嗟何
補野鳥隨人寂寂啼

城頭一握去青天想像溫王定鼎年地利應無今古
別人生堪愧小朝鮮

石礪泠泠客慮空暮天徙倚曲欄東平生苦欠看花
福三月春山無點紅
纜索聯舟下綠波晴沙芳草夕陽多人生適意應如
此頭白春風可奈何

騎牛

森翠軒前野路回烟霞不遣着塵埃世人那識騎牛

趣祗道函關紫氣來

拈荆川韻

逕松門柳儼幽居因病生閑臥擁書可笑山中稱宰
相寧期江上老樵漁

黃驪途中

江淺舟人咨路險車徒喘替人擔我苦吾道豈未善
野田綠蕪蕪白鷺雨中立見我忽驚飛昔閑今何急

紫浦途中

歸程纔數里麥隴忽無風碧草昏雲際黃梅細雨中
我牛行甚駛君馬步何工津吏嫺迎送沙頭已艤篷

自梨湖溯楊花

鼓枻楊花去微風一葉輕捕魚元可業結駟豈專榮
灘轉雨聲急潭虛山色盈忽看芳草外飛鷺掠舟橫

東郭路上口占

通雲橋上路東郭門相直安遣普世人心心如此得
路傍羣塚

纍纍皆相似荒原自郭隅誰能禁樵牧無復別賢愚
贈匡山元義民有永

露肘之衣墊角巾雖然腹笥不隨貧引錐自讀幾辛
苦下筆爲文能雅馴時至沛應魚縱壑途窮憐似鳥

依人相携此世如君少青眼朝朝每拭新

石榴

珠粒輕明丹殼腴何如橘柚產荆吳評花夏賽鋪千
錦品果秋宜薦六瑚任是楊梅還酢有除非萍實豈
甜無請君熟讀扶南記美酒盈盈日貯壺

夾澗亭分韻得空字

山房睡起眼朦朧仰首持杯問化翁自有三才及萬
物衆論每歸翁之功翁何名姓年壽幾耳目口鼻與
人同文章言語必可法三教九流倘皆通我疑翁功
向翁質其言若屈我信蒙翁若芒芒疑所對雖衆所

歸亶不聽春夏秋冬天消息生少老死人始終有暑
無寒豈天損既生又死非人恫打花雨是潤蕊雨開
葉風還吹擗風前世誰修後生福而今安在古來雄
松栢千年不改翠桃李片時無畱紅疾之胡甚夭殤
子愛亦太偏富石崇大人執德德宜一君子秉心心
宜公我今半百又四齒鬢邊二毛殊蒙戎少無他癖
老經籍鉛刀忘鈍猶磨礪名業縱媿耀青素仁智還
能樂峙融北渚溪上暮春者惠好携飲看花叢飲至
方酣看未足赤松俄過驅靈靄張傘喫飯已堪笑茅
檐繫坐真鳥籠日暮聯鑣向何處履老名園山之東

清酒將炙永今夕筵几秩秩趨羣僮忽驚吾宗大司
馬碧紗映燭跨青驄司馬英姿慣舌戰萬騎馳騁皆
駮賊我昔偏師苦與角紛然漢楚成割鴻氣藪理窟
開壁壘三交再敵塵濛濛此地相逢樂可勝比爾干
戈張爾弓我本師心復信聖不道翼翼與馮馮天人
之際宵難見靡我夫子誰折衷前有吏部抽真髓後
有廬陵盱神瞳具體顏猶苦孔卓刪定書復殘秦烘
顏不及孟無是處易完於書未敢恠滕告異喻儘雄
辯六合不言卽恕忠司馬掀髯動機變師說百萬如
詛訏四座欣欣不厭笑憑軾注目鬪虎熊誰遣河魚

入我腹江翻海攪天地霽歡娛未畢夜將半四大倩
扶歸恩恩明朝霍然太恍惚閒臥玉壺清陰中北渚
狼貝東園病輾轉思想心忡忡苟從世論尋端緒緣
翁狡獪欺人工司馬每遊誇見護身無疾恙晴暉曛
我試一遊雨兼病何負不肯少悒懔不恆多私乃如
此翁乎翁乎何萋萋我本辭拙性無諂只要明白承
皇穹我訊止此翁對善願奉此杯翁腸充不然遁辭
但饒舌我有靈心知所窮山林肅肅人悄悄陳辭竦
仄立鞠躬良久無覲復無聞翁乎翁乎真啞聾乃知
陰陽肇判後卑者自卑隆者隆人處其間自蠢蠢則

百為壽可憐蟲此物何干上帝故多煩明命制嗇豐
有天則雨身則病此理難誣三尺童人事不過自然
爾恰似回飈轉枯蓬我飲我酒樂我樂不惜日費三
百銅山顛水涯托性命三春百花九秋楓優遊直到
雙脚直聊與諸公遞郵筒歌罷陶然出門望花落鳥
啼但碧空

送趙胤卿

萬永

書狀赴瀋陽

王都一千里西直鴨江水過江四百程即是瀋陽城
此行視燕薊半猶跂不逮君辱乞驢言我將何所論
六月方霖滂兩嶺茂樹草畏道祝平安知君行路難

行水聞嗚咽石門望曠闊憶我昔遊時知君曾次奇
質館憑傳語野坂不知處當時事傷心知君灑淚深
諗君詞止此那堪慰行李臨歧更踟躕歸來雪載塗
淵泉叔從余借甲冑又云紙乏家人索一張不
得應率賦呈

淵泉大司馬青雲既身致德崇名自盛慮不及貨利
摠戎借金甲臨池無白唾此事人所恥公獨笑之啞
西山朝看氣北澗夜扶醉天放也如此何物為其累
我世傳清白於公信無愧

酒留菊隱

菊隱李生每至余室不肯
久坐飲之酒而賦詩留之

菊隱詩人貌僕僕不向公庭張萬舞力可材官拓疆
弩不肯甘心事弁武胡爲齷齪冠章甫米貴長安但
受侮無食每用書充肚有衣纔得褐及股抵死荆圍
喫萬苦苦博上舍生名取上舍生豈持門戶五十莫
養八十父嗟哉韞櫝不售賈下筆千言將何補譬如
一生人喜賭賭技轉妙家轉窶况復嗜酒氣麤莽海
內兄弟天地宇北踏冰雪幽燕土東觀日月鯨鼉府
歸來寂寞理菊圃囊藁笥墨破壁拄昔我傾蓋恨晚
覩十年契好忘賓主謙光自與籍湜伍夸言推我今
韓愈幾回盱衡論今古有時促刺訴肝腑我亦於君

默已詡高顙危準皆媚嫵但願日日首相聚談笑之
時無子午君心難繫似活虎一俛六合已再撫來如
被差去如怒不是顛風是驟雨一旬對面祇三五嗟
我索居增鄙魯睡起朝暉明雪塢紙窓氤氳暖細煦
細煦入梅珠可數疎香清境神相迂悄讀離騷苦訓
詰博山無復裊青縷起援綺桐調宮羽誰與聽者殊
踽踽忽驚楚然響庭廡君從何處來僂僂未見君前
思長窳旣見君後興便鼓喚取龍池宅中酤輕霞繞
杯光酥乳雖無鳳髓與麟脯冰江擊鮮雉離罍非故
贈君伐性斧愛汝礪礪絕酸腐百年倏忽騁駟馭不

樂幾何註鬼簿我自有物散阿堵吸盡升斗至區輒
青眸促膝揮玉塵獻可以歌呻可瘡飲者畱名須力
努儀狄非辜疏神禹莫便拂袖使人憊甕間臥作畢
吏部我不詛君出童殺欲歸當令我觴吐且倚錦屏
彩筆豎為君八叉賦杖杜

江游同竹里江右淵泉三叔北海趙侍郎

鍾永

西漁賦

水舍晨鷄喔喔鳴舟人共語早潮生此身已臥滄江
上回笑從前坐羨情

盃日復泛

積水連牕曙虛明切素襟兩儀元一妙智者亦仁心
澹澹流何極蒼蒼望却深昭文閒不鼓誰與為知音

宿石瓊樓

荒絕石瓊樓雜坐忘主客飛泉東北來噴薄穿疊石
山雨暗谷口午饕遂兼夕明年復此會應喜醉墨跡
倚欄對逝水潛悲百年客萬劫閱遊人誰能頑似石
雙筯侑美酒可以娛此夕不知畫圖中堪着少文跡
人生在世間往來均是客移文作已煩况乃復勒石
山水亦虛名歡笑即吾夕日日溪頭沙生滅幾鞮跡

次斗室咏荷

春光迴笑爛霞蒸清水高花暎碧層敷座莊嚴元淨
體涉江被服又修能露垂瓊珮規成月秋染紅紈炯
似冰四出休論玄圃樹萬枝差擬廣陵燈

送李荭館侍郎覲泃營

父作平安觀察使兒爲奎章直學士昭代名門森相
望福祿君家誰復似兒行覲父諗暇沐滿朝那不共
羨美官道迢迢沙峴西西風吹拂泃江水已將綵服
問溫清旋隨鞞鞞行邑里王儉繁華未重論卒本名
勝定其次最是鐵甕城外山旣秀而深雄且峙妙香
名義不可思福地洞天莫殫記黑頭瓌遊愛吟詩筇

屐應嫌淺處止龍武軍營月如畫羣公置酒賀行李
手中便面索我題醉墨淋漓灑摺紙自從劇盜亂天
常風行草偃非昔比懷保勞來在清嚴如今始得良
刺史刺史之兒亦時宰風流可但寄聲妓此日榮耀
心自知佇聞令德昭遐邇通行矣輕重係朝廷西人拭
目君父子

論文示天民

問余以文道爲君告始末古之有意者嗜書急飢渴
六籍先飲河九流次祭纒理亂世音辨哀正人事括
千古訖領略百家恣探撮然後敢學爲大抵主辭達

林身集 卷四
殷周溯灝噩公穀叅何曷吉凶象有著興比義可掇
莊騷追神變左國思榮割韓由孟轍蹈柳自馬羈脫
二子擅千長工妙造化奪行者舍康莊尠不憂寃跋
勸君此師法法中有死活

次蓮社韻

柴門悄悄向山開澗水潺潺繞町來閒讀道書棲靜
室醉拖隣友上層臺百年俯仰身仍老一氣蕭森秋
自迴籬下已栽徵士菊窓前須辦右丞梅

西園屬目有感

檣殼明紅檣葉黃牽牛蔓綠子玄蒼染工誰似秋風

巧吹向騷人又鬢霜

老去

老去多悽愴非關近死然詩書違宿志名業媿時賢
返少應無日憑生豈識天西風吹短髮涼雨又燈前

謾詠

初心管葛未全非晚計農桑亦已違他日誰看東國
史可憐生死九夷歸

壺中秋晚

茅堂竹室坐來清指點溪山始有名却覓松蘿勝紫
蕨旋炊秔飯憶青精閒雲自解穿林到幽澗時看落

筓明秋晚壺中饒好事曝書曝藥遇新晴

頌酒爲石閒

馨可薦神明薄亦勝茶湯知君旣愛酒寧不勸滿觴
家人釀杜鵑秫麴依古方三七畢醱醅坵泥酥酪光
輕輕泛素蟻風味不可當絹帟濾其清夜槽春雨長
綺樽盛澈澈百花讓其香其香撲人鼻其冽滌人腸
雖有不飲人焉得不少嘗况君鯨吸者久渴思欲狂
吾園羅卉植周遭依粉墻爽氣接西山清風來北岡
中有老梅樹布柯在壇傍綠實圓更磊仰視如明璫
其下繞芳草偃息不用床不醉復何爲請看此飲場

早起見山雪戲吟

山與吾顛一色攄相看卽可兩無疎春風吹後山還
黛祇恐吾顛冷自如

放慵

且休簪笏趁晨鍾山屋吟疴寄放慵此日衰形悲櫪
驥當時妄計補山龍雪連委巷無深轍風落疎籬有
遠峯稍喜雙梅相次萼熏爐紙帳可殘冬

斗室昨疊前韻投示蓋喜水仙出芽也僕與斗
室生年癡長一齒水仙之芽其出又遲一日輒
又續貂恭俟斤政

花亦如人可不奇
芽生次第序相宜
開應一日吾差
早降以連年子偶
遲秀色去雕荷共
淨同心為珮蕙
交滋却看盆水涵
清鏡都遣芳根混
鬢絲

己卯元月三日書囑晚悟老人丐仙料

三品四百種甘菊是名藥
服食無所忌明目而清膈
老去轉思深延年非所樂
但願對黃卷不被昏花隔
夜來檢本草奇方不勞獲
知君籠中貯應自刀圭適
莫惜盡情取吾詩正相直

齋宿慶熙宮內閣謾賦示檢書諸君

雕堂闕寂似仙局
三日齋居愜性靈
步倦林腰班細

綠吟巡檐角屬遙
青微風引睡茶俱熟
麗景消書飯
始停但得清閒如是了
衰年何必入山名

朝退過舊闕

宮柳迎暉拂陌塵
御溝流水動金鱗
東風一夜吹殘
雪洗却春山繞郭新

次道根足夢作韻 領聯用 夢句

溪畔沉吟似覓春
林間悄坐豈逃身
果然流水成何
事祇是飛花不近人
浮世誰曾分夢覺
餘生君可息
貪嗔山禽啼了山
逾靜日遣形神兩
得親

聞李甥樺圭手種花樹用韋蘇州韻賦示

條風動青陸土脉日以疎時雨過前宵生意含靡蕪
聞君職事微林樊閒自如方冠領小豎播植戒鋤
十年亦未遠劬力計非虛請看綠陰成爲君輯藝書
橋上望見李甥穉圭種樹園中歸而賦示
喊喊我車轍轉入苑橋口舉眼屬前林政君屋後阜
忽見三五輩散步上先後就裏戴冠者知應謂我舅
顧眄若指麾周行垣左右却有露髻漢躬腰復俛首
兩臂屢下上頗似析薪標空林宿草際豈有物拾取
意者急籬材掘土移梓柳所事雖未辨但覺饒閒趣
君自立高處亦復見我否

山館與諸生共賦

枕是槐根石代床閒披經卷靜燒香烟霞此地真成
癖歲月餘生若可忘雜坐爭於煬者席無巡亂似野
人觴坡翁自遠紅塵氣寧待田婆悟夢塲
萬轉千迴不出門似將終老此溪村樓中愛睡雲爲
伴石上忘形鳥代言食實梅從今夏分成陰楓過去
年痕哦詩取醉還多事日見山童洗硯樽

疊用前韻

山躑躅開紅暎門水楊柳暗綠藏村此間寂寂成高
坐玄解融融在不言萬物應忘天地力羣書自露古

今痕豈能飲者畱名獨至竟疎襟托酒樽

呀然坡脚住成門榆樹叅雲獨出村靈境千年神有待名泉一派妙難言斲林還我青山色掃石畱他紫蘚痕蒼潤坐來添小雨重携騷客整芳樽

雨夕與李檢書熙者李引儀明斗共賦

老有因文悟應須作事真古今無異路天地但生人已甚懸陳榻堪哈效郭巾諸君逢雨夕情話別燈頻僕上年丐竹數根種於南牕之下經歲而茂脩竿密葉儼然成林心喜欲賦久而未就是日新晴偶閱擊壤集有高竹八首遂縱筆次其韻非

曰能詩聊志愛竹之心與凡同嗜者看時已卯

五月二十八日也

藝竹南窓下土肥宜厥生筇高撐檐上鞭長循砌行不過方丈地深綠已許明乃知王子猷了不異人情竹生異凡青疎少亦孔幽經歲况成林朱夏疑清秋起居於其間嘯傲爲風流誰能工述作佳景爲余收疎懶習如性百事居人下何緣解愛竹此心堪自詫餘者固無論知音又何謝默默期歲寒欲忘不能罷猗猗百十竿一一含高濤微風時動之相切爲玉聲既雨晴亦佳蕭然非世情雖有攸心人見應消不平

高柳鋪爲障圓松擎作蓋二者雖所欣曷如此君對
動靜合清真無語有神會譬彼籬下菊獨爲徵士愛
倚欄弄叢玉緬惟巧植初初只兩根得猶遣吾顏舒
蕃茂直如此分人今有餘此意欲相值不論金萬銖
寥寥天蓋高立不離頂上西南利攸行復能知所向
不見常鄙吝望之卽幽曠心乎有敬慕何啻貴公相
爲節信挺然生不以掩葉肯如閒卉木詰屈自芽甲
晨興諷千回夕來行百匝何妨死埋此欲借劉伶鍤

栽竹了次韓吏部詠筍韻

湖郵烏竹至手植逼庭軒築杵纔封密披襟已滌煩

參差行部曲羅列擁兒孫地理占依石人勞息去盆
生均符近遠態異割晨昏苦節凌霜厲虛心就日溫
拊疑玄玉削攀欲碧霄騫培壤功常見澆泉妙獨存
萌抽方似束包絡定窮垠淇澳寧專美吳儂詎妄言
辰宜追舊斲丁可護新根肉厚應供笛叢稠亦壯藩
蔚斑窺豹變蜿委效蛇奔恨結臨無水癡思布滿園
烟霞增秀色雨露積洪恩萬尺摸須絹十尋咏在垣
清奇傾檜栢澹泊猥椒蓀漏月知中夜干雲候上番
名高松並立材適荻何論正喜當牕穩居然破塊繁
竿脩堪繫釣筍細奈違飡琅爾環鳴屨森吾戟樹門

風梢憐夏拂雪葉想冬掀蔑子休來覘標童敢折髡
深深畱醉睡落落淨詩魂愛好情忘倦相看自出暎

夜吟示菊隱

山雨淒淒山木深簾間燕坐夜涼侵甘酸啼笑紛紛
事三十年來始識心

待月應須到夜深恐君先被睡魔侵雲興雲滅祇俄
頃特地空明見我心

未始西軒坐不深每憐人事日相侵三宵却枕寒泉
臥勝向如來一懺心

石田茅屋歌戲贈金生天叙

山蹊犂确牛蹄缺一畝一日耕未訖草廬蕭灑八九
間身兼妻子容槃桓耕有訖時種有穫槃桓足處豈
無樂勸君及此少年時占個巖壑討便宜切莫彷徨
城市內名利無當恨鬢絲

贈金宇夏

已証詰朝飲猶嫌餘夜遲小亭臨別界良讌及芳時
愛汝曾無芥憐吾鬢有絲新交元莫樂苦癖况能詩

次李子田韻同寄淵泉族叔北漢煉藥之所

名山修寶劑法火調靈液九年再奉 旨不奇我公
跡秋深雲臥冷天近沆瀣積小別及七日衰顏應返

澤欲從匪道遠悵望憂思劇

送殷山縣監朴公益 來謙

去年風動繡衣聲今日翻看五馬行澹澹亭前秋水
在會教人比使君清

華城

霜落郊原百稼同晴收銍結四隣通天心眷眷仁無
外民力勞勞利在中樓號新豐逢樂歲堤成如意見
神功度支經用從今足無復詩人賦大東
樹密龍珠寺後峯寺藏不見但聞鍾天回鑾蹕開三
界地與 珠邱隔數重法力其能資國脉緇徒謾自

習軍容前溪水漲無人渡記得禪牕午睡慵

不憚征塵上客衣離家三日便忘歸祇緣長路看山
好自是平居出郭稀殘照鴉棲紅葉動遙空鴈盡白
雲飛行携物色催驅馬十里鋤村興莫違

過李友新老 在秀鄉居

斜日黔陽縣治西連山雨氣尚淒淒見愁轍陷逢新
潦聞怯橋崩漲舊溪寥廓心隨霜鴈舉間關行趁暮
鴉啼亭臯葉脫秋陰迥幾度回頭惜解携
官道秋泥信馬回愁情強借野酤開黃花處處迎霜
發白鴈時時拖雨來豈有文章藏石室真無功業畫

雲臺百年齷齪餘絲鬢拋擲初心亦可哀

過牛陂二憂相國故亭

先憂後樂寓斯亭山淨江空地亦靈何事殘秋客過
日滿籬黃菊鎖塵扃

衿川書院

黔山磅礴大江濱此地生公信有神文曲星精驚遠
使高麗氣數係宗臣千年香火英靈邃百代威名竹
素新自古才難今更急扶持安得借斯人

望讓寧大君祠

可與顛狂可與清浮雲千乘自純誠生爲東國閒公

子死逐西方古佛兄天下應多王季業人間祇少伯
夷名夕陽無限荒坡路遺廟丹青照眼明

重遊奉元寺

回頭三十九年空驀地重來似夢中舊識惟餘黃面
佛同行皆作皓鬚翁榭林長矣江沙隔松篁依然石
砌通恨未曾畱題壁句如今好見碧紗籠

又與諸友共賦

一去無還並逝年房中不見舊棲禪如何未悟前塵
妄又與新知種惡緣
英豪自古法門依難道荒塗失所歸紫陌瞢騰連我

是儒冠多少愧僧衣

白雪人烟合青山道氣通新遊寺舊在往事水流空

地下誰從晤樽前淚不窮忽驚魂入夢樑月曉朦朧

此僕遊奉元寺作也同遊者趙君素李叔嘉金明遠
俞子範金士精李文五李士昭趙士顯皆和之越一
夜子範夢與李兄伯古氏相晤如平昔李兄曰汝輩
之遊吾已知之汝輩之押通字豈能如此乎仍誦云
白而其人烟合青山道氣通奇且異哉李兄之墓草將
宿而禁爽不泯猶復眷戀吾輩於冥漠有無之中
耶自不禁槍然而感潛然而淚也且同遊者多矣子
範獨能夢之亦可見其襟懷之虛曠僕不忍歸其夢
於幻也必能錄鄙作又識此以贈君素君素深於
情者也

送孝田宰天安

念我曾無得意時紅塵白首轉堪悲自從結個芳隣

約四老燈前翫展眉

送三行人權景義 敦仁

衰年不禁意飛騰萬里君行我亦曾曩屢燕山眠處
雪嵯峨遼水飲餘冰梯航遠俗殊觀得王霸雄圖古
蹟憑四海彌天樽俎裏賞心勝似上元燈

梅下共元李二生次山谷韻

窓外三寒還四暄室中一榻復雙樽龕梅着雪當殘
臘椽筆題詩限七言敢擬文人誇識路多慚才子辱
登門清談細酌渾忘倦不覺林梢夕照翻

春夜宿玉壺精舍

不寐春山夜茅齋月滿庭莎光澄露砌花影宿雲扃
寂妙心同化淒清氣自醒知渠堪解賞恨未共來停
寓吟
白雲白於雪碧霄碧於水聲臭既兩無形色從何起
悠悠復寥寥積望但如彼有時而不者又孰主張是
並雖非天故非天亦曷以

春朝漫吟

花枝不動露珠團簾閣朝暄散宿寒最愛碧梧經歲
色綠沈槍掣過闌干

春雨有感次宋人韻奉呈斗室

春風惻惻春雨細春晝無人小窓閉抱書自睡睡自
覺枕痕印頰唾沆袂生不濟事豈相瞞死難捨愚惟
長計人生役役期百年百年之後教誰繼忽憶黃驪
江上路無數青山似佛髻此間如有葬我地真成兩
棄君平世

寄石閒捕魚舟次

居然契闊五經旬佳句吟誰與訂新花事虛期隣舍
酒山遊又謝去年春鷄鳴風雨懷君子魚忘江湖似
至人無限閒愁消不得海門芳草正傷神

李郎肯愚將遊嶺南賦贈

隔江不見尚勞哉嶺外睽分作底懷瓜葛未專青眼
許菁華欲盡白頭催行邊雲樹迷千里別意春燈湛
一杯鄒魯遺風言此地知君講習足成材

內舍重修畢詩以志喜

經始成之摠五旬雖然仍舊亦維新衛荆元足居完
美張老還應頌奐輪樂與寡妻商晚計剩畱餘地待
來辰携書每向隣家宿三十年前似許身

四月十三夕宿壺舍

并序

是夕來遽只兩僦從焉邀君素辭以持齋入
夜山月如燭少憩壘雲樓徐步松影下意甚

悠然顧無可與語者遂返室張燈酌兄弟并
泉和蜜與松花飲之甜香沁肺案頭抽一軸
乃石閒去年除夕寄兒子元根絕句也披覽
已不覺悵然於心蓋石閒隨道根遊平壤而
元根自海西往會其兄計大家跌宕歡讌於
名勝之地惟我獨不能致身也於是磨墨伸
紙信筆步韻爲序其實

我有玉壺舍往來如逆旅去冬曾幾何今節已屆暑
比隣老詩人遠遊大同館寧知今夜月我來山舍看
前巷趙夫子持齋耐寥寂相邀不肯來送敬惟山僕

境是然而然詩惟不得不停筇倚老松低枝雲共拂
山月迥無翳如對于懸客一行苦作吏春盡音書隔
日出則還生幾多難平事寧知臯與夔不懷巢許志
山屋隔更鼓夜分依月轉多事嶺頭雲無心猶百變
林燈耿相射村舍如窮鄉夜深聞泝泝山意增清涼
誰子卜於昔逍遙吾自今清溪抱碧巘悠悠天地深
曉月掛西峰峭壁如凝霜將心自勸意光輝永無忘
抽架得長幅雙眸分外明此老雖酣酣苦吟多正聲
在澗寤歌獨飲酒既多又自笑詩不羣狂態發其舊
石閒有書道元根願解腰間墨綬歸閒田讀十

年書云戲賦絕句反其意蓋亦寓勉也

閒讀十年言固善言猶外耳事方真若將過往思來
者未宦曾如已宦人
外事豈能移所好立心隨地最要真焦勞孰並田家
作尚有朝耕暮讀人

玉壺夜聽風雨

不寐中林萬竅囂空階聽滴更寥寥南風吹急疑山
徙東海愁深覺夜遙謾有園亭通市陌那無筋力給
耕樵年馳日邁從君輩將酒論詩送暮朝

伊川倅柳和之惠石鼎遂次退之石鼎聯句韻

以謝之

伊川柳府伯貽余資飪烹瑩瑩次玉質礚礚蓄磬聲
妙理配坎離允德叶元亨想像巧匠斲定使山神驚
制度尚古奇磨琢彌堅貞銅斗品相等瓦樽名敢爭
今看似蟹匡昔譬謬馬纓外貌有凝重中心無不平
除鑽生罅隙若鏟落牙萌設耳非爲聰斂足勿憂傾
色自帶蒼潤氣常含冷清型範恰中規接受宜戒盈
篆以饜饕形紋如苔蘚成代器貯乾濡比礎驗雨晴
奚令松冠戴端合鐵脚撐鉛汞漫安爐山川誰煮鑄
染龜休動指養龍差號坑材餘渡佛船狀肖浮軍嬰

便腹肯相負隻手猶可擎語功叅媧鍊調味適殷羹
厝必審安危問寧及重輕吉終食雉膏蠲矧供柔盛
烟試藍田出雲覆泰時橫耿光敲蒸噓暗籟瀉沸鳴
饑飧見有實烹魚懷至誠用苟盡爾才美應厭我情
水先涇渭辨火貴文武并敦匱斯風下炎涼却露呈
翫占逢金鉉延壽邁錢鏗百朋寵踰分三復喜難名
室坐長摩挲巖棲亦掣搔久已炊黃梁會須餌青精
臨風誦嘉惠爰賦石鼎行

贈明遠天民義民

石閒愛進杯中物門前草色如伸蔚蓉城音好能楚

聲百篇口誦無一吃匡山介性如於陵以書為糧不
事乞三人者非凡鳥羣誰使翩翩入我厨竹房梅屋
夜繼晷驩然詩筆與談拂忘形忘齒得天倪古云神
交今髣髴余亦曾間有青霞為君朝暮吐鬱鬱望中
多少春山色安得相携謝簪紱

次泊翁韻

山氣蒼蒼日色沉更無車馬到中林鳴蟬似引登高
興棲鳥時窺習靜心往跡模糊春夢散真交次第九
原深長途力盡流光促胡不歸歟驪水陰

直廬苦熱答朴學士眉皓

綺壽

見寄韻

萋萋忽散露杲杲牲幣無靈亞卿禱直廬庫隘不見
天一日便添一日惱氣歎炊甑坐其中頭也涔涔心
焉擣百方思救救不得與其湯旱寧堯潦潦亦前年
所已經民命幾令不重造萬物融解欲混沌曷若有
形而乾槁旱猶有滓滂無滓此諺久傳農家老矧今
農情日入聞雨暘西南均五道東北畿甸雖少愆料
度不應遂無稻一需倘能及此時農憂暑苦當並掃
不然不雨但清風定使羣生得暫好所望非奢亦非
難天公不肯諒幽抱汗濕蒸薰化紫苔遍體粟發如
滋草太官冰漿縱時霑點雪洪爐沃便燥發狂欲叫

又不敢解拋衣帶謾顛倒却願驀然生羽翰高舉江海俯浩浩復願精誠似烈婦霜飛凜凜感蒼昊兩莫能遂出下策錦城不如還家早迫窘懣煩訴無地強向文房喚四寶胡亂寫罷苦熱吟狂譫不合存其稿

偶題

寥落樓居似佛天燒香不省是官緣溪流濺濺寒沙出山葉離離夕雨懸自有枯棊當寂寞如無馴鶴絕周旋此間曾着人多少消受還能箇箇然

詠史

諸呂豈叛者朱虛自爲兄韋臯挾奸闖八賢蒙惡名

釋印如擲塊漢朝誰弄兵疵政一時去唐社寧危傾功名信難處真假常易情鄒叟善讀書數策取武成借問談玄士何術補邦家腥塵滿天地赤縣似裂瓜一片江隅土時鳴井底蛙淒涼六朝間過鳥更飄花置置不須道使我長發嗟

楓皋集卷之四

